

**«ԵՐԵՎԱՆԻ ՄԽԻԹԱՐ ՀԵՐԱՑՈՒ ԱՆՎԱՆ ՊԵՏԱԿԱՆ ԲԺՇԿԱԿԱՆ ՀԱՄԱԼՍԱՐԱՆ»  
հիմնադրամի ուսանողական ինքնակառավարման համակարգի  
կանոնադրություն**

**ԲՈՎԱՆԴԱԿՈՒԹՅՈՒՆ**

**ԳԼՈՒԽ 1. ԸՆԴՀԱՆՈՒՐ ԴՐՈՒՅԹՆԵՐ**

- Հոդված 1. Անվանում և կարգավիճակ
- Հոդված 2. Նպատակներ
- Հոդված 3. Խնդիրներ
- Հոդված 4. Գործունեության սկզբունքներ

**ԳԼՈՒԽ 2. ԿԱՌՈՒՑՎԱԾՔ և ՄԱՐՄԻՆՆԵՐ**

- Հոդված 5. Կառուցվածք
- Հոդված 6. Ուսանողական ներկայացուչական մարմին՝ Ուսանողական խորհրդարան
- Հոդված 7. Ուսանողական խորհրդարանի նախագահ
- Հոդված 8. Ուսանողական ինքնակառավարման համակարգի կոորդինացնող օղակ՝  
Նախագահության խորհուրդ
- Հոդված 9. Ուսանողական ինքնակառավարման մարմիններ
- Հոդված 10. Վերահսկիչ հանձնաժողով

**ԳԼՈՒԽ 3. ԿԱՌԱՎԱՐՄԱՆ ԵՎ ԳՈՐԾՈՒՆԵՈՒԹՅԱՆ ԿԱՐԳԱՎՈՐՈՒՄՆԵՐԸ**

- Հոդված 11. Կառավարման ձևերը ուսանողական ինքնակառավարման համակարգում
- Հոդված 12. Փոխհարաբերությունը բուհի ղեկավարության հետ
- Հոդված 13. Համակարգին տրամադրվող միջոցները
- Հոդված 14. Փոխհարաբերությունը արտաքին գործընկեր կառույցների հետ

**Գլուխ 4. Եզրափակիչ մաս**

- Հոդված 15. Կանոնադրության փոփոխություններ և լրացումներ

# **ԳԼՈՒԽ 1. ԸՆԴՀԱՆՈՒՐ ԴՐՈՒՅԹՆԵՐ**

## **Յոդված 1. Անվանում և կարգավիճակ**

1.1 «Երևանի Մխիթար Յերացու անվան պետական բժշկական համալսարան»-ի (այսուհետ՝ համալսարան) ուսանողական ինքնակառավարման համակարգը հանդիսանում է համալսարանում գործող անկախ՝ ներկայացուցչական և ինքնակառավարվող ուսանողական մարմինների համագործակցային համակարգ, որը արտահայտում և պաշտպանում է ուսանողության համընդհանուր շահերը:

1.2 Համակարգը գործում է ՀՀ Սահմանադրության, ՀՀ օրենսդրության, համալսարանի ներքին կանոնակարգերի և միջազգային ուսանողական կառույցների հիմնարար սկզբունքների հիման վրա՝ որպես ուսանողական ինքնակառավարման համագործակցային համակարգ:

1.3 Համակարգը չունի իրավաբանական անձի կարգավիճակ, սակայն հանդիսանում է համալսարանի կազմում գործող ինքնավար ուսանողական համակարգ, որը գործում է սեփական կանոնադրությամբ (սույնով) և՛ անհրաժեշտության դեպքում, համագործակցում է համալսարանի և այլ պետական ու հասարակական կառույցների հետ՝ ուսանողների շահերի ներկայացման և պաշտպանության նպատակով:

1.4 Համակարգը ունի սեփական խորհրդանիշերը, կնիքը, պաշտոնական ձևաթղթերը, ամսագրերը, էլեկտրոնային հաղորդակցության միջոցները և սոցիալական ցանցերի էջերը, որոնք հաստատվում և կարգավորվում են խորհրդարանի բարձրագույն ղեկավար մարմինների կողմից:

1.5 Համակարգը հիմնական գործունեությունը ծավալում է համալսարանի տարածքում և ունի համալսարանի կողմից տրամադրված մշտական տեղակայման հասցե:

1.6 Համակարգի պաշտոնական աշխատանքային լեզուն հայերենն է, սակայն միջազգային համագործակցության, օտարերկրյա ուսանողների ներգրավվածության դեպքում օգտագործվում է նաև անգլերենը կամ այլ համապատասխան լեզուներ՝ բազմալեզվության և ներառականության ապահովման նպատակով:

## **Յոդված 2. Նպատակներ**

2.1. Համակարգի հիմնական նպատակը համալսարանի ուսանողության գերակա շահի սպասարկումն է, ուսանողական ծայնի լսելիության ապահովումը:

2.2. Ներկայացնել և պաշտպանել ուսանողների կրթական, սոցիալ-տնտեսական, իրավական, հոգեբանական և մասնագիտական շահերը՝ հիմնվելով ուսանողակենտրոնության, համերաշխության և արդարության սկզբունքների վրա:

2.3. Աջակցել համալսարանում կրթական միջավայրի շարունակական բարելավմանը՝ խթանելով ուսանողների ներգրավումը կրթության կազմակերպման, բարեփոխման և գնահատման գործընթացներում: Ապահովել ուսանողների ներգրավածությունը, որպես համակառավարման լիիրավ կողմ:

2.4. Նպաստել ուսանողի մասնագիտական ինքնագիտակցության, էթիկական պատասխանատվության և քաղաքացիական արժեքների ձևավորմանը:

2.5. Կայունացնել և զարգացնել ուսանողական ինքնակառավարման համակարգի ինստիտուցիոնալ հիմքերը՝ ապահովելով ներառական, բազմազան և խտրականությունից զերծ ուսանողական միջավայր:

2.6. Նպաստել ուսանողների ներգրավմանը գիտահետազոտական, կլինիկական, հանրային առողջության և առողջապահական քաղաքականության գործընթացներում որպես ապագա բժիշկների և առողջապահության պատասխանատու մասնագետների:

2.7. Աջակցել ուսանողական նախաձեռնություններին, ինչպես նաև խթանել նոր նախաձեռնությունների ձևավորումը՝ հիմնված սույն կանոնադրությամբ սահմանված արժեքների և սկզբունքների վրա:

2.8. Նպաստել առողջ ուսանողական մթնոլորտի ձևավորմանը՝ մշակելով և իրականացնելով ծրագրեր, որոնք ուղղված են ուսանողների կրթական, սոցիալական, մշակութային, մարզական, հոգեբանական կարիքների բավարարմանը, ուսանողների մասնագիտական կողմնորոշմանը, կարիերայի պլանավորմանը և անձի ձևավորմանը:

2.9. Աջակցել համալսարանական կյանքի համապարփակ զարգացմանը՝ խթանելով միջմշակութային, միջհամալսարանական և համայնքային ներգրավվածությունը:

2.10. Նպաստել ուսանողների իրազեկվածությանը՝ տեղեկատվության թափանցիկ տարածման, կրթական, իրավական ու սոցիալական հնարավորությունների մասին տեղեկացման և մասնակցության խթանման միջոցով:

### **Հոդված 3. ԽՆԴԻՐՆԵՐ**

3.1. Փոխադարձ վստահությամբ և վերահսկողությամբ ապահովել, որ ուսանողական մարմինները գործեն խորհրդարանի կանոնադրությամբ սահմանված նպատակների և սկզբունքների հիման վրա: Ապահովել դրանց գործունեության համար անհրաժեշտ միջոցները:

3.2. Խթանել ուսանողների առաջնորդական և ինքնակազմակերպման կարողությունների զարգացումը՝ որպես համալսարանական կառավարման գործընթացներում լիարժեք մասնակիցներ:

3.3. Հստակ գործառույթային ինքնակառավարման մարմինների միջոցով ստեղծել մատչելի և գործառնական միջավայր ուսանողական նախաձեռնությունների ներկայացմանն ու իրականացմանն աջակցելու համար:

3.4. Ապահովել ուսանողական համայնքի և համալսարանի ղեկավարության, լիազոր մարմինների միջև կառուցողական երկխոսություն:

3.5. Իրականացնել մշտադիտարկում ուսանողական կարիքների վերաբերյալ՝ հիմնվելով ներառական մասնակցության և շարունակական հետադարձ կապի մեխանիզմների վրա:

3.6. Չարգացնել համագործակցությունը տեղական, ազգային և միջազգային ուսանողական կառույցների հետ՝ փորձի փոխանակման և համատեղ նախագծերի իրականացման միջոցով:

#### **Հոդված 4. Գործունեության սկզբունքներ**

4.1. Մարդու արժանապատվության և հիմնարար իրավունքների պահպանում.  
Համակարգի գործունեության ելակետը մարդու արժանապատվությունն է:  
Խորհրդարանը գործում է համաձայն Մարդու իրավունքների համընդհանուր հռչակագրի և ՀՀ Սահմանադրության՝ ճանաչելով ուսանողի անձի ամբողջականությունը, ազատությունն ու իրավահավասարությունը:

4.2. Հավասարություն և խտրականության բացառում.  
Ապահովել բոլոր ուսանողների հավասար ներգրավվածությունը՝ անկախ տարիքից, սեռից, ազգությունից, սոցիալական և առողջական կարգավիճակից, սեռական կողմնորոշումից, կրոնական կամ քաղաքական հայացքներից: Կառույցը խստորեն մերժում է խտրականության ցանկացած ձև:

4.3. Ներկայացուցչականություն և ներառական մասնակցայնություն.  
Համակարգը գործում է որպես համալսարանի ողջ ուսանողության ներկայացուցչական մարմին՝ ապահովելով ուսանողների հավասար մասնակցությունն ու ներկայացվածությունը բոլոր մակարդակներում: Քաջալերվում է փոքրամասնություն կազմող խմբերի ակտիվ ներգրավվածությունը:

4.4. Ուսանողի որպես սուբյեկտի ճանաչում և հզորացում.  
Համակարգը ճանաչում է ուսանողին ոչ միայն որպես շահառու, այլ որպես լիիրավ մասնակից՝ կրթության քաղաքականության ձևավորման գործընթացում և ոչ միայն: Ուսանողները դիտարկվում են որպես բուհի համակառավարման լիարժեք անդամ:

Համակարգը պաշտպանում է ուսանողների կարծիքի արտահայտման ազատությունը, խթանում է նրանց ներգրավվածությունը ազդելու իրենց կրթական և սոցիալական միջավայրի ձևավորման, բարեփոխման, կառավարման և գնահատման գործընթացներում: Խթանելով նորարար մտածողությունը, քննադատական վերլուծությունը և ուսանողների մասնակցությունը հանրային կյանքին՝ զարգացնելով նրանց որպես ակտիվ, տեղեկացված և պատասխանատու քաղաքացիներ:

#### 4.5. Անկախություն և ինքնավարություն.

Համակարգը գործում է անկախ որևէ արտաքին կառույցից՝ ներառյալ քաղաքական, կրոնական, պետական կամ կոմերցիոն միավորներ: Ապահովվում է կառույցի ինքնավարությունը՝ իր ներքին կանոնադրությամբ և մանդատով սահմանված շրջանակներում:

#### 4.6. Հաշվետվողականություն, թափանցիկություն և հանրային վերահսկողություն.

Համակարգը պարտավորվում է ապահովել իր գործունեության թափանցիկությունը՝ հրապարակելով որոշումները և տարեկան հաշվետվությունները:

#### 4.7. Ժողովրդավարություն.

Համակարգը գործում է ժողովրդավարական սկզբունքներով. բոլոր ղեկավար մարմինները ձևավորվում են ընտրությունների միջոցով՝ հավասար ձայնի իրավունքով: Ղեկավարության մանդատները սահմանափակ են ժամանակով և պարբերաբար ենթակա են ընտրության՝ ապահովելով ղեկավար պաշտոնների թարմացվող բնույթը:

#### 4.8. Միջավայրի մատչելիություն.

Համակարգը ապահովում է ուսանողների համար հավասար մասնակցային հնարավորություններ՝ ֆիզիկական, հոգեբանական և սոցիալ-մշակութային մատչելիություն բոլոր ուսանողների համար: Այդ թվում նաև ներառական պայմաններ հաշմանդամություն ունեցող անձանց, սոցիալապես խոցելի խմբերի, ազգային փոքրամասնությունների և այլ ուսանողների լիարժեք մասնակցության համար:

#### 4.9. Համերաշխություն և մշակութային բազմազանություն.

Համակարգը հավատարիմ է տարբեր մշակույթների, լեզուների և ինքնությունների հանդեպ հարգանքի սկզբունքին՝ նպաստելով բազմամշակութային երկխոսությանը, համակցությանը, փոխօգնությանը և բարեկամությանը ուսանողական միջավայրում:

#### 4.10. Կրթության որակի մշտադիտարկում և բարելավում.

Համակարգը պարտավորվում է շարունակաբար հետևել կրթության որակին և ուսանողների ակնկալիքներին՝ առաջ քաշելով որակական բարեփոխումների օրակարգ և պաշտպանելով ուսանողների շահերը կրթական բարեփոխումների ընթացքում:

#### 4.11. Տեղեկատվության մատչելիություն և թվայնացում.

Համակարգը պարտավորվում է ապահովել ուսանողների լիարժեք իրազեկվածությունն իր գործունեության, հնարավորությունների և մասնակցության մեխանիզմների մասին՝ կիրառելով արդի թվային տեխնոլոգիաները և բաց տվյալների սկզբունքները:

4.12. Բնապահպանական և սոցիալական պատասխանատվություն.

Համակարգը նպաստում է շրջակա միջավայրի պաշտպանությանը միտված նախաձեռնություններին, պատասխանատու սպառմանը և սոցիալական արդարությանը:

## **ԳԼՈՒԽ 2. Կառուցվածք և մարմիններ**

### **Հոդված 5. Կառուցվածք**

5.1 Ուսանողական ինքնակառավարման համակարգի ընդհանուր նկարագիրը.

Ուսանողական ինքնակառավարման համակարգը բուհում ունի հստակ, հիերարխիկ, բայց ոչ կենտրոնացված կառուցվածք, համակարգը գործում է փոխհամագործակցային սկզբունքով, որտեղ ուսանողական բարձրագույն մարմինը ունի համակարգող և ներկայացուցչական դեր, իսկ առանձին ինքնակառավարման մարմինները հստակ ուղղվածության ինքնավար գործառույթներ:

5.2 Ուսանողական ինքնակառավարման համակարգը ներառում է՝

- ուսանողական ներկայացուցչական մարմին՝ **ուսանողական խորհրդարան**,
- ուսանողական այլ **ինքնակառավարման մարմիններ**, որոնք գործում են սույն կանոնակարգին համապատասխան՝ իրենց ներքին կանոնակարգերով,
- կոորդինացնող օղակ՝ **ուսանողական խորհուրդ (նախագահություն)**, որը ապահովում է ուսանողական խորհրդարանի և բուհում գործող ուսանողական մյուս ինքնակառավարման մարմինների փոխկապակցումը և համագործակցությունը,
- **վերահսկիչ հանձնաժողով**, որը վերահսկում է ուսանողական ինքնակառավարման մարմինների գործունեության իրավաչափությունը:

### **Հոդված 6. Ուսանողական ներկայացուցչական մարմին՝ Ուսանողական խորհրդարան (ՈՒԽ)**

#### **6.1 Ընհանուր բնութագիրը**

6.1.1. Ուսանողական խորհրդարանը հանդիսանում է բուհի ուսանողական համայնքի բարձրագույն ներկայացուցչական մարմինը:

6.1.2. Ուսանողական խորհրդարանը իրավասու է հանդես գալ ուսանողական համայնքի անունից բուհի կառավարման բոլոր մակարդակներում:

6.1.3. Ուսանողական խորհրդարանը՝ որպես համաբուհական ներկայացուցչական մարմին, բաղկացած է 20 ընտրված անդամից:

6.1.4. Ուսանողական խորհրդարանի յուրաքանչյուր անդամի լիազորությունների ժամկետը 2 տարի է, եթե սույն կանոնակարգով սահմանված հիմքերով անդամի կամ տվյալ գումարման ուսանողական խորհրդարանի լիազորությունները ավելի վաղ չեն դադարեցվում:

## **6.2 Ձևավորման կարգը**

6.2.1. Ուսանողական խորհրդարանը ձևավորվում է բուհի ուսանողների կողմից՝ համաբուհական ընտրությունների միջոցով՝ անկախ ֆակուլտետային և կուրսային պատկանելությունից:

6.2.2. Ընտրական գործընթացը կազմակերպում է բուհում գործող ընտրական անկախ մարմինը, ապահովելով հավասար մասնակցության, թափանցիկության և գաղտնի քվեարկության սկզբունքները:

6.2.3. Ուսանողական խորհրդարանի լիազորությունները լրանալուց առնվազն 3 ամիս առաջ խորհրդարանի նախագահը գրավոր կերպով դիմում է բուհում գործող ընտրական անկախ մարմին, որը սահմանված կարգով կազմակերպում է ընտրությունները:

6.2.4. Բուհի ուսանողները ունեն հավասար ընտրական իրավունք՝ որպես ընտրող:

6.2.5. Ընտրությունները անցկացվում են առնվազն յուրաքանչյուր երկու տարին մեկ:

6.2.6. Ընտրություններից առնվազն 2 ամիս առաջ բուհի ուսանողությանը տեղեկացվում է այդ մասին՝ ինչպես պաշտոնական ծանուցման ձևաչափով (բուհի կողմից ուսանողներին տրամադրված էլեկտրոնային փոստի միջոցով), այնպես էլ ուսանողական խորհրդարանի և բուհի տարբեր էլեկտրոնային հարթակների միջոցով:

6.2.8. Թեկնածուների գրանցումը կատարվում է ծանուցումից հետո մինչև 20 աշխատանքային օրվա ընթացքում:

6.2.9. Բուհի բոլոր ուսանողները ունեն հավասար մասնակցային իրավունք՝ որպես թեկնածու: Ուսանողական խորհրդարանի անդամի թեկնածու կարող է առաջադրվել յուրաքանչյուր ուսանող, ով բավարարում է հետևյալ պահանջներին.

- Ունի ակտիվ ուսանողական կարգավիճակ և չի գտնվում ակադեմիական արձակուրդում:
- Ունի վերջին ուսումնական տարվա միջին որակական գնահատական (ՄՈԳ) առնվազն 7.0 կամ վերջին ուսումնական տարվա ընթացքում ուսանողի ակտիվության գնահատման համակարգում ունենա նվազագույնը միջին ակտիվություն, որը հավաստվում է համակարգում նախորդ տարվա ուսանողների տվյալների օբյեկտիվ վիճակագրական վերլուծության հիման վրա (բարձր, միջին, ցածր խմբերի առանձնացմամբ):
- Համաձայն է ընտրական գործընթացում հանդես գալ բաց և հաշվետու կերպով՝ պատրաստ լինելով պատասխանել ուսանողության հարցերին:
- Թեկնածուն պարտավոր է ներկայացնել իր գործունեության ծրագիրը, որտեղ արտացոլվում են ուսանողական կյանքի, կրթական միջավայրի և ինքնակառավարման համակարգի զարգացման իր տեսլականը և առաջարկները: Ծրագրի չներկայացումը համարվում է ինքնաբացարկ և հիմք է թեկնածուին չգրանցելու համար:

Թեկնածուի գործունեության ծրագիրը հանդիսանում է փաստաթուղթ, որտեղ թեկնածուն ներկայացնում է իր տեսլականը, առաջնահերթությունները և գործողությունների պլանը՝ իր առաջադրման մարմնի լիազորությունների շրջանակում: Ծրագիրը պետք է արտացոլի.

- բուհում ուսանողական կյանքի զարգացման հիմնական ուղղությունները,
- ուսանողների իրավունքների պաշտպանության և մասնակցության ապահովման մոտեցումները,
- համագործակցության ձևերը այլ ուսանողական և կառավարման մարմինների հետ,
- նախաձեռնությունների և ծրագրերի իրականացման մեխանիզմները,
- թափանցիկության, հաշվետվողականության ապահովման միջոցները:

Գործունեության ծրագիրը ներկայացվում է գրավոր ձևով և հրապարակվում է ընտրություններից առնվազն 20 աշխատանքային օր առաջ:

### **6.3. Խորհրդարանը իր գործունեության շրջանակում իրականացնում է հետևյալ լիազորությունները.**

6.3.1. Սույն կանոնակարգում փոփոխություններ և լրացումներ կատարելու վերաբերյալ առաջարկի ներկայացում բուհի հոգաբարձուների խորհրդին:

6.3.2. Իր կազմից ընտրել նախագահ, որը ի պաշտոնե հանդիսանում է կորդինացնող մարմնի նախագահ:

6.3.3. Բուհի կանոնադրությամբ սահմանված կարգով, Ուսանողական ներկայացուցչական մարմինը իր կազմից ներկայացնում է ուսանող անդամներին բուհի

Հոգաբարձուների խորհուրդ: Ընտրված է համարվում այն թեկնածուն, ով ստացել է քվեարկությանը մասնակցած ուսանողների ձայների առնվազն 50% + 1-ը (պարզ մեծամասնություն): Եթե որևէ թեկնածուի կողմից ձայների պարզ մեծամասնությունը ստանալ չի հաջողվում, ապա անցկացվում է քվեարկության երկրորդ փուլ: Երկրորդ փուլին մասնակցում են այն երկու թեկնածուները, ովքեր ունեն ուսանողի ակտիվության գնահատման համակարգում տվյալ տարվա կտրվածքով ամենաբարձր միավորները, իսկ այդ տվյալների բացակայության դեպքում՝ ամենաբարձր ՄՈԳ-ն (միջին որակական գնահատական) ունեցող թեկնածուները: Երկրորդ փուլում կրկին հավասար ձայներ ստանալու դեպքում ընտրված է համարվում այն թեկնածուն, ով ունի ուսանողի ակտիվության գնահատման համակարգում ավելի բարձր միավոր, իսկ այս տվյալների բացակայության դեպքում՝ ամենաբարձր ՄՈԳ ցուցանիշը:

6.3.4. Ուսանողական ինքնակառավարման համակարգի համար մշակել և հաստատել ներքին կարգավորումներ:

6.3.5. Մշակել և նախագահությանը ներկայացնել ուսանողական ինքնակառավարման ռազմավարական ուղղություններ, որոնք խորհրդի կողմից ենթադրում են պարտադիր կատարում համապատասխան գործառույթային ինքնակառավարման մարմնի կողմից: ՈւԻՄ-ների զարգացման ուղղությամբ խորհրդարանը կարող է հաստատել միասնական ռազմավարական փաստաթուղթ՝ երկարաժամկետ տեսլականով և նպատակներով:

6.3.6. Հետևել ուսանողական ինքնակառավարման մարմինների գործունեության կատարողականությանը՝ ըստ նրանց կողմից ներկայացված տարեկան գործողությունների պլանի, ինչպես նաև գնահատել իրականացված նախաձեռնությունների համապատասխանությունը սահմանված ռազմավարական ուղղություններին:

6.3.7. Ուսանողական մարմինների կողմից իրականացվող ծրագրերի արդյունավետության վերաբերյալ առաջարկներ ներկայացնել վերահսկիչ հանձնաժողովին:

6.3.8. Ապահովել ուսանողական ինքնակառավարման համակարգի գործունեության թափանցիկություն, ներառականություն և հաշվետվողականություն ուսանողության առջև:

6.3.9. Ուսանողական ինքնակառավարման համակարգի բարձրագույն մարմինը կարող է իր գործունեության արդյունավետության բարձրացման նպատակով սահմանել ներկայացուցչական ենթակազմեր կամ պատասխանատու անձինք (իր կազմից և ոչ միայն)՝ ուսանողական համայնքի առանձին խմբերի շահերն ամբողջական

ներկայացնելու նպատակով: Խմբային պատասխանատուները հանդիսանում են ուսանողական խորհրդարանի խորհրդատվական կարգավիճակ ունեցող ներկայացուցիչներ, որոնք ապահովում են առանձին ուսանողական խմբերի հետաքրքրությունների փոխանցումը և երկկողմանի հաղորդակցությունը:

6.3.9.1 Այդ խմբային ներկայացուցչությունը կարող է հիմնվել հետևյալ չափորոշիչների վրա՝

- ֆակուլտետային պատկանելություն,
- օտարալեզու կամ բազմալեզու կրթական ծրագրերի ուսանողներ (մշակութային լեզվական առանձնահատկություններ),
- մասնագիտական ուղղվածության կամ ակադեմիական հատուկ խմբերի առանձնահատկություն:

6.3.9.2. Նշված պատասխանատուները ընտրվում են ուսանողական ինքնակառավարման համակարգի բարձրագույն մարմնի կողմից սահմանված կարգով՝ բաց և թափանցիկ առաջադրման սկզբունքների պահպանմամբ (կարող է առաջադրվել ցանկացած ուսանող):

6.3.9.3. Խմբային պատասխանատուները ունեն հետևյալ լիազորությունները՝

- Ներկայացնել իրենց համապատասխան ուսանողական խմբի խնդիրները, առաջարկությունները և նկատառումները ուսանողական խորհրդարանին կամ նախագահությանը՝ սահմանված կարգով:
- Մասնակցել խորհրդարանի, խորհրդի, ինքնակառավարման մարմինների նիստերին՝ որպես հրավիրված խորհրդատու անձ, առանց ձայնի իրավունքի (եթե համատեղության կարգով չունեն լիարժեք անդամի կարգավիճակ) :
- Ուսանողների և ինքնակառավարման մարմինների միջև գործել որպես կապող օղակ:
- Իրավունք ունենալ ուսանողական բարեկեցությանը վերաբերող թեմաների շուրջ գործունեություն իրականացնել (բայց ոչ-գործադիր ձևաչափով)՝ հանդիպումների, քննարկումների ձևաչափով տվյալների հավաքագրման և առաջարկությունների ներկայացման նպատակով համապատասխան մարմնին:

6.3.9.4. Խմբային պատասխանատուները չպետք է և չեն կարող՝

- Գործադիր կամ կառավարման լիազորություններ ունենալ
- Չունեն ծրագրեր կամ միջոցառումներ իրագործելու ինքնուրույն իրավասություն
- Չեն կարող միջամտել ինքնակառավարման մարմինների ներքին կառավարմանը

**6.4. Խորհրդարանի անդամն իր գործունեության ընթացքում ունի հետևյալ լիազորությունները.**

- 6.4.1 Ուսանողական խորհրդարանի ադամը հանդիսանում է ուսանողության լիիրավ ներկայացուցիչը և կարող է ներկայացնել ուսանողների կարծիքը, խնդիրները և առաջարկությունները ուսանողական ինքնակառավարման համակարգի ցանկացած օղակում:
- 6.4.2 Մասնակցել Ուսանողական խորհրդարանի բոլոր նիստերին, քննարկումներին և քվեարկություններին՝ իր ձայնի իրավունքով:
- 6.4.3 Ներկայացնել առաջարկներ Ուսանողական խորհրդարանի նիստերի օրակարգում հարցեր ներառելու, ինչպես նաև գործող կանոնակարգերի, ծրագրերի և որոշումների կատարելագործման վերաբերյալ: Առաջարկել նոր նախաձեռնություններ կամ նախագծեր ուսանողական համայնքի շահերից ելնելով:
- 6.4.4 Մասնակցել Ուսանողական խորհրդարանի կողմից ստեղծվող աշխատանքային խմբերի աշխատանքին: Անդամակցել ուսանողական ինքնակառավարման մյուս համակարգերին բացառությամբ վերահսկիչ հանձնաժողովի:
- 6.4.5 Ներկայացնել իր անհամաձայնությունը կամ լրացուցիչ կարծիքը՝ որպես արձանագրված հատուկ կարծիք: Առանձին հարցերի կամ ինքնակառավարման մարմինների տարեկան հաշվետվությունների վերաբերյալ:
- 6.4.6 Ստանալ ուսանողական ինքնակառավարման համակարգի գործունեության, նիստերի, որոշումների և ֆինանսական հաշվետվությունների վերաբերյալ ամբողջական տեղեկատվություն:
- 6.4.7 Թեկնածու լինել խորհրդարանի նախագահի, քարտուղարի կամ աշխատանքային խմբերի ղեկավարների պաշտոնների համար՝ սահմանված չափանիշներին համապատասխանելու դեպքում:
- 6.4.8 Նպաստել որոշումների կատարողականի ապահովմանը և խորհրդարանի հեղինակության ամրապնդմանը: Խնդիրներ արձանագրելու դեպքում սահմանված ձևաչափով դիմել վերահսկիչ հանձնաժողով:
- 6.4.9 Վերահսկել նախագահի գործունեությունը և անհրաժեշտության դեպքում սահմանված կարգով անվստահություն հայտնել:

## **6.5 Ուսանողական խորհրդարանի անդամի պարտականությունները**

- 6.5.1 Պարտավոր է հաշվետու լինել նրան ընտրած ուսանողներին և պարբերաբար ներկայացնել իր գործունեության մասին ամփոփ տեղեկատվություն:
- 6.5.2 Պարտավոր է իր գործունեությունը իրականացնել բուհի և խորհրդարանի կանոնադրությանը, ինչպես նաև ուսանողական էթիկայի կանոններին համապատասխան:
- 6.5.3 Պետք է ցուցաբերի բարձր էթիկական վարքագիծ, հարգալից վերաբերմունք ուսանողների, դասախոսների և աշխատակիցների նկատմամբ:
- 6.5.4 Անթույլատրելի է բուհի կամ խորհրդարանի հեղինակությունը նսեմացնող, ապատեղեկատվություն տարածող կամ խտրականություն առաջացնող վարքագիծը:

- 6.5.5 Պարտավոր է ներկայացնել ուսանողական համայնքի ընդհանուր շահերը՝ առանց անհատական կամ ֆակուլտետային կողմնակալության:
- 6.5.6 Պարտավոր է չհրապարակել խորհրդարանի նիստերի ընթացքում քննարկված ներքին կամ գաղտնի բնույթի տեղեկությունները առանց խորհրդի համաձայնության:
- 6.5.7 Պարտավոր է պահպանել ուսանողական ակտիվության գնահատման համակարգում իր ակտիվ մասնակցությունը՝ նվազագույնը միջին ակտիվություն:
- 6.5.8 Պարտավոր է գործել գործընկերային և կառուցողական ձևով՝ հարգելով խորհրդարանի մյուս անդամների տեսակետները:
- 6.5.9

**6.6. Ուսն անդամի լիազորությունները դադարեցվում են հետևյալ դեպքերում.**

- 6.6.1. Սեփական դիմումի համաձայն, անդամի լիազորություններից ինքնակամ հրաժարվելու ձևով:
- 6.6.2. Ուսանողի կարգավիճակի դադարեցման դեպքում:
- 6.6.3. Անգործության դեպքում, որը հավաստվում է ուսանողի ակտիվության գնահատման համակարգում նվազագույնը միջին ակտիվության չապահովմամբ:
- 6.6.4. Էթիկական կամ կարգապահական խախտման՝ հաստատված համապատասխան մարմնի (բուհի էթիկայի կամ կարգապահական հանձնաժողովի) որոշմամբ:
- 6.6.5. Անդամի լիազորությունները դադարեցվում են , եթե նա՝
  - օգտագործում է Ուսանողական խորհրդարանի հարթակները կամ միջոցառումները քաղաքական կամ կրոնական քարոզչության նպատակով,
  - հանդես է գալիս բուհի և ուսանողական ինքնակառավարման արժեքներին հակասող հրապարակային հայտարարություններով,
  - տարածում է ապատեղեկատվություն կամ խեղաթյուրում է փաստերը, որոնք կարող են վնասել Ուսանողական խորհրդարանի, բուհի կամ այլ ուսանողների հեղինակությանը:

**Նշում.** Նման դեպքերի գնահատումն ու որոշումը կատարվում է վերահսկիչ հանձնաժողովի կողմից՝ ներքին քննության ընթացակարգով:

- 6.6.6. Ուսն անդամի լիազորությունները դադարեցվում են խորհրդարանի նիստերին չմասնակցելու դեպքում՝ առանց հիմնավորված պատճառի մեկ անգամ բացակայելու, կամ հարգելի պատճառով երեքից ավելի բացակայելու դեպքում՝ մեկ ուսումնական տարվա ընթացքում:

**Նշում.** Հարգելի պատճառ համարվում է բժշկական, ընտանեկան կամ ուսումնական ծանրակշիռ հանգամանքը, որի մասին անդամը նախապես գրավոր կերպով տեղեկացրել է խորհրդարանի քարտուղարությանը կամ նախագահին:

6.6.7. Լիազորությունների դադարեցման մասին որոշումը կայացնում է վերահսկիչ հանձնաժողովը, համապատասխան միջնորդությունների հիման վրա:

6.6.8. Լիազորությունների դադարեցման դեպքում առաջացած թափուր տեղը լրացվում է՝ ա. ընտրացուցակի հաջորդող թեկնածուով՝ ըստ ընտրությունների արդյունքների, բ. կամ անհրաժեշտության դեպքում՝ կազմակերպվում է լրացուցիչ ընտրություն՝ վերահսկիչ հանձնաժողովի միջնորդությամբ հոգաբարձուների խորհրդի որոշմամբ:

## **Յոդված 7. Ուսանողական խորհրդարանի նախագահ**

### **7.1. Ընդհանուր բնութագիրը**

7.1.1. Ուսանողական խորհրդարանի նախագահը հանդիսանում է ուսանողական խորհրդարանի բարձրագույն ներկայացուցիչը և գլխավոր պատասխանատուն բոլոր ուսանողական ինքնակառավարման համակարգի գործունեության համար:

7.1.2. Նախագահը ղեկավարում է Ուսանողական խորհրդարանի աշխատանքը, կազմակերպում և համակարգում համալսարանական բոլոր ուսանողական ինքնակառավարման մարմինների հետ համագործակցությունը՝ նախագահության նիստերի միջոցով:

### **7.2 Նախագահի ընտրության կարգը**

7.2.1. Ուսանողական խորհրդարանի նախագահի ընտրությունը կատարվում է ուսանողական խորհրդարանի ձևավորմանը հաջորդող առաջին նիստի ընթացքում՝ փակ (գաղտնի) քվեարկությամբ:

7.2.2. Ուսանողական խորհրդարանի առաջին նիստը վարում է տարիքով ամենաավագ ներկայացուցիչը:

7.2.3. Ուսանողական խորհրդարանի նախագահի թեկնածու կարող է լինել միայն խորհրդարանի այն անդամը, ով համապատասխանում է հետևյալ չափանիշներին.

- Ուսանողի ակտիվության գնահատման համակարգում ունենա նվազագույնը միջին ակտիվություն որը հավաստվում է համակարգում՝ նախորդ ուսումնական տարվա ուսանողների տվյալների օբյեկտիվ վիճակագրական վերլուծության հիման վրա (բարձր, միջին, ցածր խմբերի առանձնացմամբ):
- Ունի առաջնորդական և կազմակերպչական հմտություններ, ինչը պետք է հավաստվի առնվազն երեք ծրագրի կամ միջոցառման նախաձեռնման և ամբողջական ղեկավարման փաստերով, որոնք իրականացվել են ուսանողական ինքնակառավարման համակարգում:
- Տիրապետում է հստակ և կառուցվածքային արտահայտման, բանավիճելու և բանակցելու հմտություններին:

7.2.4. Նախագահի թեկնածուն պարտավոր է ուսանողական խորհրդարանին ներկայացնել իր գործունեության ռազմավարական ծրագիրը, որը պետք է ներառի երկու բաղադրիչ.

1. Տարեկան գործողությունների ծրագիր.  
Ներկայացնում է հաջորդ ուսումնական տարվա ընթացքում իրագործվելիք հստակ նախագծային ուղղությունները, միջոցառումները և կառուցվածքային բարեփոխումները՝ հստակ նպատակներով, ժամկետներով:  
Տարեկան ծրագիրը ծառայում է որպես նախագահի գործունեության հիմնական ռազմավարական ուղենիշ, որին համահունչ նա ներկայացնում է իր տարեկան գործունեության հաշվետվությունները:
2. Երկամյա ռազմավարական ծրագիր.  
Սա թեկնածուի կողմից ներկայացվող ՈւԽ տեսլական է, որի հիմքում դրված է ոչ թե առանձին գործողությունների իրականացումը, այլ ուժերի, ռեսուրսների և նախաձեռնությունների համակարգումը՝ ուսանողական ինքնակառավարման որևէ ոլորտի կատարելագործման ուղղությամբ: Ոլորտի ընտրության պարզաբանումը և առաջնահերթությունները կարող են ձևավորվել ըստ ժամանակի պահանջով առաջացող կարիքների և կամ մի շարք այլ հիմնավորումներով:

7.2.5. Քվեարկությունը կատարվում է փակ, գաղտնի ձևով, ընտրված է համարվում այն թեկնածուն, ով հավաքում է խորհրդարանի անդամների ամենաշատ ձայները:

7.2.6. Եթե քվեարկության արդյունքում երկու կամ ավելի թեկնածուներ ստանում են նույնքան ձայներ, ապա անցկացվում է վերաքվեարկություն՝ միայն այդ թեկնածուների միջև:

Եթե վերաքվեարկության արդյունքում ևս պահպանվում է ձայների հավասարությունը՝ ապա հաղթող է ճանաչվում այն թեկնածուն, ով ուսանողի ակտիվության գնահատման համակարգում ունի ավելի մեծ միավոր:

7.2.7. Ընտրված նախագահի հաստատված ծրագիրը ենթակա է հրապարակման ՈւԽ-ի պաշտոնական հարթակներում՝ ուսանողության լայն իրազեկվածությունը ապահովելու նպատակով:

7.2.8. Ուսանողը կարող է ընտրվել ուսանողական խորհրդարանի նախագահ մեկ անգամ առանց վերընտրվելու հնարավորության:

### **7.3. Նախագահի լիազորությունները**

7.3.1. Ուսանողական խորհրդարանի նախագահը ղեկավարում է ուսանողական խորհրդարանի աշխատանքը և ապահովում է դրա արդյունավետ գործունեությունը:

7.3.2. Կազմակերպում և նախագահում է Ուսանողական խորհրդարանի նիստերը, ստորագրում է նիստերի արձանագրությունները և ընդունված որոշումները: Ունի

ստորագրության և կնքման իրավունք Ուսանողական խորհրդարանի պաշտոնական փաստաթղթերի, որոշումների և նամակագրության վրա:

7.3.3. Ներկայացնում է Ուսանողական խորհրդարանը և ամբողջ ուսանողական ինքնակառավարման համակարգը բուհի կառավարման մարմիններում, ինչպես նաև արտաքին հարաբերություններում:

7.3.4. Կոորդինացնում է նախագահության աշխատանքը և ապահովում խորհրդարանի և մյուս ուսանողական ինքնակառավարման մարմինների համագործակցությունը:

7.3.5. Հետևում է խորհրդարանի ընդունած որոշումների և ծրագրերի իրականացման ընթացքին՝ ստանձնելով պատասխանատվություն դրանց կատարողականության համար:

7.3.6. Ներկայացնում է Ուսանողական խորհրդարանը տարեկան հաշվետվությունը ընդլայնված նիստին:

7.3.7. Իրականացնում է ուսանողական նախաձեռնությունների և ծրագրերի ռազմավարական ուղղությունների մշակման և հաստատման գործընթացի ընդհանուր ղեկավարումը:

7.3.8. Ներկայացնում է ուսանողական ինքնակառավարման համակարգի գործունեության վերաբերյալ առաջարկներ և հաշվետվություններ բուհի ղեկավարությանը և հոգաբարձուների խորհրդին:

7.3.9. Պատասխանատու է ուսանողական ինքնակառավարման համակարգի կանոնադրության, ներքին կարգապահական և էթիկական նորմերի պահպանման համար:

7.3.10. Խորհրդարանի հաստատմանը կարող է ներկայացնել առաջարկություններ՝ ձևավորելու ժամանակավոր գործունեության աշխատանքային խմբեր կոնկրետ ծրագրերի կամ խնդիրների կատարման նպատակով:

7.3.11. Նախաձեռնում է ուսանողական խորհրդարանի և նախագահության նիստերի գումարումը՝ ըստ անհրաժեշտության կամ խորհրդարանի անդամների առնվազն 1/3-ի պահանջով:

7.3.12. Պահպանելով խորհրդարանական կառավարման սկզբունքը՝ նախագահը չի կարող միանձնյա ընդունել որոշումներ, որոնք օրենքով կամ սույն կանոնադրությամբ վերապահված են խորհրդարանին կամ նախագահությանը:

7.3.14. Նախագահը անձամբ պատասխանատվություն է կրում բուհի կողմից ուսանողական ինքնակառավարման համակարգին տրամադրված միջոցների նպատակային, արդյունավետ և հաշվետու օգտագործման համար՝ համաձայն բուհի ֆինանսական կանոնակարգերի:

7.3.15. Համակարգել համալսարանի բոլոր ուսանողական ինքնակառավարման մարմինների համագործակցությունը և ապահովել տեղեկատվության շարունակական հոսքը դրանց միջև:

7.3.16. Մշակել և ներկայացնել ուսանողական խորհրդարանի հաստատմանը տարվա գործունեության ռազմավարական ծրագիրը: Ապահովել ծրագրի իրագործման արդյունավետ ընթացքը և պարբերաբար ներկայացնել կատարված աշխատանքների ամփոփ հաշվետվություններ (տարեկան նվազագույնը 1 անգամ):

7.3.17. Պարտավոր է խորհրդարանին տեղեկացնել բոլոր որոշումների, ստորագրած փաստաթղթերի և ընդունված նախաձեռնությունների մասին: Խորհրդարանի պահանջով պարտավոր է ներկայացնել լրացուցիչ բացատրություններ կամ հաշվետվություններ՝ առանձին ծրագրերի և միջոցառումների վերաբերյալ:

7.3.18 Նախագահը պարտավոր է ապահովել ուսանողության հետ երկխոսության և լսելիության հստակ մեխանիզմներ՝ կազմակերպելով որոշակի պարբերականությամբ հստակ ձևաչափերով հանդիպումներ, որտեղ ուսանողները կարող են ներկայացնել իրենց առաջարկները, խնդիրները և դիտարկումները ուսանողական կյանքի վերաբերյալ:

7.3.19. Նախագահը պարտավոր է յուրաքանչյուր տարվա ավարտին ներկայացնել ուսանողական խորհրդարանին և ընդլայնված նիստին տարեկան հաշվետվություն՝ որպես իր գործունեության հիմնական ռազմավարական ուղենիշ հիմք ընդունելով Ուսանողական խորհրդարանի նախագահի ընտրությունների ընթացքում ներկայացրած գործունեության ծրագրերը:

7.3.20.1. Նախագահը ներկայացուցչական մարմնի անդամներից նշանակում է փոխնախագահ:

7.3.20.2. Փոխնախագահի լիազորությունները սահմանվում են Ուսանողական խորհրդարանի նախագահի կողմից՝ սույն կանոնակարգին համապատասխան: Նախագահը կարող է իր լիազորություններից որոշակի մասը փոխանցել փոխնախագահին:

Փոխնախագահը չի կարող ընդունել այնպիսի որոշումներ, որոնք օրենքով կամ սույն կանոնակարգով վերապահված են բացառապես Ուսանողական խորհրդարանի նախագահին կամ Ուսանողական խորհրդարանին:

7.3.21. Նախագահը նշանակում է քարտուղար, որի լիազորությունների շրջանակը սահմանվում է ներքին կարգավորումներով:

#### **7.4. Նախագահի լիազորությունները դադարեցվում են հետևյալ դեպքերում՝**

7.4.1. Նախագահի կողմից հրաժարական ներկայացնելու դեպքում՝ խորհրդարանին գրավոր դիմումին համաձայն:

7.4.2 Նախագահի լիազորությունների ժամկետի լրանալու դեպքում:

7.4.3. Եթե դադարում է ունենալ ուսանողի կարգավիճակ:

7.4.4. Խորհրդարանի առնվազն 2/3-ի կողմից անվստահություն հայտնելու պարագայում (փակ գաղտնի քվեարկության ընթացակարգով) : Նիստի արձանագրությունը ներկայացվում է վերահսկիչ հանձնաժողովին և բուհի ղեկավարությանը տեղեկության կարգով:

#### 4.4.5. Վերահսկիչ հանձնաժողովի որոշմամբ հետևյալ դեպքերում՝

- Նախագահի կողմից իր պարտականությունների կրկնակի կամ համակարգային չկատարման, ինչպես նաև ֆինանսական միջոցների ոչ նպատակային օգտագործման դեպքում: Մեկ ուսումնական կիսամյակի ընթացքում հաստատված գործողությունների պլանի 50%-ից պակաս կատարողականության դեպքում:
- քաղաքական, կրոնական կամ կուսակցական քարոզչության իրականացման, ինչպես նաև ապատեղեկատվություն տարածելու կամ համալսարանի հեղինակությանը վնաս հասցնելու դեպքերում:
- անհատական կամ խմբային շահ սպասարկելու պարագայում, եթե կան փաստական հիմքեր:
- դիտավորությամբ որևէ ինքնակառավարման մարմնի գործունեության անհիմն խոչընդոտման պարագայում:
- ուսանողական ինքնակառավարման համակարգում ընդգրկված ուսանողների օրենքով սահմանված հնարավորությունների սահմանափակման, անարդար մասնակցային հնարավորությունների ստեղծման, հասանելիք խրախուսումների տրամադրմանը խոչընդոտելու դեպքերում:

#### **7.5 Ուսանողական խորհրդարանի նախագահի ժամանակավոր պաշտոնակատար նշանակվում է հետևյալ դեպքերում.**

- Նախագահի հրաժարականի կամ լիազորությունների դադարեցման դեպքում մինչև նոր նախագահի ընտրությունը:
- Նախագահի երկարատև (10 աշխատանքային օրից ավել) բացակայության դեպքում՝ առողջական, ուսումնական կամ անձնական պատճառներով:

7.5.1. Նախագահի լիազորությունների դադարեցման պահից մինչև նոր նախագահի ընտրությունը Ուսանողական խորհրդարանի նախագահի պարտականությունները կատարում է խորհրդարանի փոխնախագահը ժամանակավոր պաշտոնակատարի (ԺՊ)՝ կարգավիճակով:

7.5.2. Նոր նախագահի ընտրությունները կազմակերպվում են նախագահի լիազորությունները դադարելուց ոչ ուշ քան 30 օրվա ընթացքում սահմանված ընթացակարգով:

7.5.3. Նախագահի լիազորությունները դադարելուց առավելագույնը 30 օրվա ընթացքում համապատասխան ընթացակարգով նոր նախագահի չընտրվելու պարագայում վերահսկիչ հանձնաժողովի կողմից միջնորդություն է ներկայացվում հոգաբարձուների խորհրդին՝ կազմակերպել ներկայացուցչական մարմնի նոր ընտրություններ:

7.5.4. ԺՊ-ի կողմից ընդունված բոլոր որոշումները ուժի մեջ են մտնում միայն խորհրդարանի կողմից հաստատվելու պարագայում: ԺՊ-ի լիազորությունները

սահմանափակվում են բացառապես ընթացիկ և տեխնիկական բնույթի հարցերով, այդ թվում՝

- նիստերի կազմակերպում և վարում,
- ընթացիկ նամակագրության և կազմակերպչական աշխատանքների համակարգում,
- բուհի կառավարման մարմինների հետ ընթացիկ կապի ապահովում,
- խորհրդարանի ընդունած որոշումների իրականացման վերահսկում:

7.5.5. ԺՊ-ն չի կարող.

- նախաձեռնել կառուցվածքային կամ ռազմավարական փոփոխություններ,
- կատարել նշանակումներ կամ հեռացումներ,
- ստորագրել իրավական կամ ֆինանսական պարտավորություններ ստեղծող փաստաթղթեր առանց խորհրդարանի հաստատման,
- փոփոխել խորհրդարանի հաստատած ծրագրերը կամ բյուջեն:

7.5.6. ԺՊ-ը պաշտոնավարում է առավելագույնը 30 օր՝ մինչև նոր նախագահի ընտրության անցկացումը: Եթե այդ ընթացքում չեն անցկացվում նախագահի ընտրություններ, ինքնակառավարման համակարգը անցում է կատարում խորհրդային կառավարման:

7.5.7. ԺՊ-ն պարտավոր է հաշվետվություն ներկայացնել խորհրդարանին իր պաշտոնավարման ընթացքում իրականացված բոլոր գործողությունների վերաբերյալ:

## **Հոդված 8 Ուսանողական ինքնակառավարման համակարգի կորդինացնող օղակ՝ Ուսանողական խորհուրդ (նախագահություն)**

### **8.1. Ընդհանուր բնութագիր**

8.1.1. Նախագահությունը հանդիսանում է ուսանողական ինքնակառավարման համակարգի գործադիր մարմինը, որը ապահովում է խորհրդարանի ընդունած որոշումների, ռազմավարական ծրագրերի և տարեկան գործողությունների պլանի իրականացումը:

8.1.2. Նախագահությունը համակարգում է բուհում գործող ուսանողական ինքնակառավարման մարմինների աշխատանքը փոխադարձ վերահսկողության և գործընկերային մթնոլորտում, ապահովում տեղեկատվության շրջանառությունն ու համագործակցությունը դրանց միջև:

### **8.2. Ձևավորման կարգը**

8.2.1. Նախագահության կազմը ձևավորվում է ի պաշտոնե, առանց լրացուցիչ ընտրության, ներառելով ուսանողական ինքնակառավարման համակարգի հետևյալ օղակների ղեկավարներին՝ (ձայնի իրավունքով)

- Ուսանողական խորհրդարանի նախագահը՝ որպես խորհրդի ղեկավար (նախագահ),
- Բուհում գործող բոլոր ուսանողական ինքնակառավարման մարմինների նախագահները՝ որպես անդամներ,

8.2.2. Նախագահության կազմում ձայնի իրավունքով կարող են ընդգրկվել միայն այն ինքնակառավարման մարմինների ղեկավարները, որոնք գործում են բուհում գրանցված և կանոնակարգով հաստատված կարգով:

8.2.3. Նախագահության կազմում սեփական դիմումի համաձայն առանց ձայնի իրավունքի կարող են ընդգրկվել փոխնախագահը, քարտուղարը, խմբային պատասխանատուները, ԵՊԲՀ ֆուլթջի ուսանողական ինքնակառավարման մարմինների կողմից ընտրված ներկայացուցիչը:

8.2.3. Նախագահության կազմում նախագահի միջնորդությամբ առանց ձայնի իրավունքի կարող են ընդգրկվել հրավիրյալ այլ անձինք:

### **8.3. Նախագահության լիազորությունները**

8.3.1. Նախագահությունը ապահովում է Ուսանողական խորհրդարանի ընդունած որոշումների կատարումն ու դրանց իրականացումը բուհի ուսանողական ինքնակառավարման համակարգում:

8.3.2. Կազմակերպում է ուսանողական ինքնակառավարման մարմինների գործունեության համակարգումը՝ խուսափելով գործառույթային կրկնությունից:

8.3.3. Ներկայացնում է Ուսանողական խորհրդարանին ուսանողական միջավայրում իրականացվող ընթացիկ գործունեության, նախաձեռնությունների և ծրագրերի վերաբերյալ տեղեկատվություն և առաջարկություններ: Այդ թվում կարող է ներկայացնել առաջարկություններ ձևավորելու հստակ գործառույթային աշխատանքային խմբեր ժամանակավոր գործունեությամբ:

8.3.4. Ապահովում է ուսանողական ծրագրերի հաստատումը, գնահատումը, ֆինանսական և նյութատեխնիկական աջակցությունը՝ սահմանված կարգերով և կարգավորումներով ապահովելով հավասար մասնակցային հնարավորություններ:

8.3.5. Մշակել և խորհրդարանի հաստատմանը ներկայացնել ուսանողական ինքնակառավարման համակարգի գործունեության հետ կապված, կառուցվածքային փոփոխություններ, ներքին կարգավորումներ:

#### **8.4. Նախագահության նիստերի կազմակերպման կարգը**

8.4.1. Նախագահության նիստերը գումարվում են առնվազն շաբաթը մեկ անգամ: Արտահերթ նիստերը գումարվում են նախագահի նախաձեռնությամբ կամ նախագահության անդամների առնվազն 1/3-ի պահանջով:

8.4.2. Նախագահության նիստը համարվում է իրավազոր, եթե ներկա է նախագահության անդամների կեսից ավելին: Քվորումի բացակայության դեպքում նիստը չի կարող կայանալ:

8.4.3. Խորհրդի նիստերը վարում է ուսանողական խորհրդարանի նախագահը, իսկ նրա բացակայության դեպքում՝ փոխնախագահը:

8.4.4. Ինքնակառավարման մարմինների ղեկավարները նիստին չներկայանալու դեպքում պարտավոր են նախապես տեղեկացնել Ուսանողական խորհրդարանի նախագահին և իրենց փոխարեն նշանակել փոխնախագահին՝ լիազորելով նրան ներկայացնելու տվյալ մարմին:

8.4.5. Նիստերի օրակարգը նախապես կազմվում և տրամադրվում է անդամներին: Շտապ հարցերի դեպքում հնարավոր է օրակարգային լրացումներ:

8.4.6. Որոշումները ընդունվում են բաց քվեարկությամբ՝ ներկա անդամների ձայների պարզ մեծամասնությամբ: Ընդունված որոշումները ենթակա են պարտադիր կատարման, եթե դրանք չեն բողոքարկվում վերահսկիչ հանձնաժողով:

8.4.7. Յուրաքանչյուր նիստի ընթացքում կազմվում է արձանագրություն, որը ստորագրվում է նախագահողի և քարտուղարի կողմից:

8.4.8. Նիստերի արձանագրությունները և ընդունված որոշումները պահվում են գրանցամատյանում և հասանելի են Ուսանողական խորհրդարանի անդամներին՝ պահանջի դեպքում:

#### **8.5. Նախագահության անդամների պարտականություններ**

8.5.1. Նախագահության անդամները պատասխանատու են նախագահության նիստերում հաստատված աշխատանքային պլանների և որոշումների կատարողականի համար:

8.5.2. Պարտավոր են նախագահությանը ներկայացնել ինքնակառավարման մարմնի գործունեության ընթացիկ հաշվետվությունները:

8.5.3. Համագործակցել ՈւԼԽ-ի և նախագահության մյուս անդամների հետ՝ համակարգելու ուսանողական կյանքի, կրթական միջավայրի և ինքնակառավարման գործընթացների զարգացումը:

## **8.6. Նախագահության անդամի լիազորությունների դադարեցման հիմքերը**

8.6.1. Նախագահության անդամների լիազորությունները շարունակվում են այնքան ժամանակ, որքան նրանք զբաղեցնում են համապատասխան մարմնի նախագահի պաշտոնը: Նրանց լիազորությունները դադարում են ինքնակառավարման մարմնի ղեկավարի կարգավիճակի դադարեցման պահից:

8.6.2. Չգուշացում կամ կարգապահական միջոցներ կարող են կիրառվել՝ մեկ կամ մի քանի նիստերում անպատասխանատվություն ցուցաբերելու, քաղաքական/կրոնական քարոզչություն իրականացնելու, ապատեղեկատվություն տարածելու, նախագահության կողմից ընդունված որոշումների իրականացմանը խոչնդոտելու դեպքերում վերահսկիչ հանձնաժողովի որոշմամբ:

## **Յոթերորդ 9. Ուսանողական ինքնակառավարման մարմիններ**

### **9.1. Ընդհանուր բնութագիրը**

9.1.1. Ուսանողական ինքնակառավարման մարմինները (ՈւԻՄ) հանդիսանում են բուհի ուսանողական ինքնակառավարման համակարգի գործադիր՝ հստակ գործառույթային միավորներ, որոնք ձևավորվում են ուսանողների նախաձեռնությամբ:

9.1.2. Ուսանողական ինքնակառավարման մարմինների գործունեությունը հիմնված է ուսանողների ինքնուրույն նախաձեռնության, հավասար մասնակցային հնարավորությունների, թափանցիկության, հաշվետվողականության և համագործակցության սկզբունքների վրա:

9.1.3. Ուսանողական ինքնակառավարման մարմինները գործում են սույն կանոնակարգի, ուսանողական ինքնակառավարման համակարգի բարձրագույն օղակների (ուսանողական խորհրդարան, նախագահություն) կողմից հաստատված ներքին կարգավորումների և սեփական կանոնակարգերի հիման վրա և հաշվետու են ուսանողությանը՝ ըստ իրենց գործունեության ոլորտի:

3.1.4. Ինքնակառավարման մարմինը ճանաչվում է բուհի ուսանողական ինքնակառավարման համակարգի մաս՝ նախագահության որոշմամբ:

### **9.2. Ինքնակառավարման մարմինը պետք է բավարարի հետևյալ չափանիշներին.**

9.2.1. Ինքնակառավարման մարմինը ձևավորվում է մեկ հստակ նպատակ իրականացնելու համար, որը համապատասխանում է ուսանողական ինքնակառավարման համակարգի սույն կանոնադրությամբ սահմանած նպատակային ուղղություններին և չի հակասում ամրագրված սկզբունքներին: Նպատակին հասնելու համար մարմինը սահմանում է հստակ և չափելի խնդիրներ՝ որոնք հստակ ամրագրվում են իր ներքին կանոնակարգում:

**9.2.2.** Իր գործունեությամբ չի կրկնում արդեն գործող որևէ ինքնակառավարման մարմնի գործառույթները:

**9.2.3.** Ունի հստակ կառավարման կառուցվածք՝ ղեկավար, փոխնախագահ, քարտուղար, բաժիններ կամ հանձնախմբեր, ինչպես նաև այլ պատասխանատու պաշտոններ:

**9.2.4.** Ունենա գործունեության անընդհատությանը միտված հստակ ընթացակարգ: Ներկայացնի տարեկան գործողությունների պլան և հաշվետվություն:

**9.2.5.** Իրականացնի գործունեություն, որը նպաստում է ուսանողական կյանքի, կրթական միջավայրի և ինքնակառավարման համակարգի շարունակական զարգացմանը: Գործունեությունը պետք է խրախուսի նոր գաղափարների, նախագծերի և մեխանիզմների ներդրումը, որոնք ուղղված են ուսանողական միջավայրի շարունակական կատարելագործմանը:

**9.2.6.** Գործի մասնակցային և ժողովրդավար սկզբունքներով, ապահովի անդամակցության բաց և թափանցիկ համակարգ:

**9.2.7.** Չթույլատրի խտրական, զրպարտիչ, ապատեղեկատվական կամ էթիկապես ոչ ընդունելի վարքագիծ:

**9.2.8.** Սահմանի ուսանողական համայնքի հետ կապի, երկխոսության և արձագանքման հստակ մեխանիզմներ՝ ուսանողների առաջարկների և խնդիրների ներկայացման ու քննարկման համար, ըստ գործունեության ոլորտի :

**9.2.9.** Մարմինները պարտավոր են գործել համագործակցային միջավայրում՝ փոխադարձ հարգանքով, վստահությամբ և համերաշխությամբ: Իր գործունեության շրջանակում համագործակցելով ուսանողական ինքնակառավարման համակարգի մյուս մարմինների, բուհի կառավարման և վարչական ստորաբաժանումների, ինչպես նաև արտաքին գործընկեր կառույցների հետ:

**9.2.10.** Գործի ինքնուրույն և կրի պատասխանատվություն իր ընդունած որոշումների և դրանց հետևանքների համար: Յուրաքանչյուր մարմին ինքնուրույն է իր գործունեության ծրագրերի և որոշումների իրականացման հարցում, սակայն պարտավոր է հաշվետու լինել նախագահությանը և ուսանողությանը՝ ներկայացնելով պարբերական հաշվետվություններ:

**9.2.11.** Ինքնակառավարման մարմնի անդամ կարող է դառնալ յուրաքանչյուր ուսանող՝ առանց խոչընդոտների՝ ներկայացնելով անդամակցության գրավոր հայտ: Սակայն ծայնի իրավունք նոր անդամը ձեռք է բերում 3 նիստի ներկայանալու պարագայում կամ առավելագույնը 1 ամսվա ընթացքում:

**9.2.12.** Ինքնակառավարման մարմնի նախագահի և ենթակառուցվածքային ստորաբաժանումների ղեկավարների պաշտոնները սահմանափակվում են

ժողովրդավարական ընտրություններով և ժամկետով՝ առավելագույնը երկու (2) տարի առանց վերընտրվելու հնարավորությամբ:

9.2.13. Ինքնակառավարման մարմնի նախագահը ի պաշտոնե ընդգրկվում է ուսանողական նախագահության կազմում:

9.2.14. Ուսանողական ինքնակառավարման մարմինների գործունեությունը պետք է ապահովի ինստիտուցիոնալ շարունակականություն և փորձի փոխանցում հաջորդ կազմերին:

9.2.15. Ուսանողական ինքնակառավարման մարմինները ապահովում է նոր անդամների պատրաստման, առաջնորդական հմտությունների զարգացման և կառավարման մշակույթի ձևավորման գործընթացը:

9.2.16. Ինքնակառավարման մարմինը պարտավոր է ենթարկվել ուսանողության շրջանում քվեարկությամբ ընդունված որոշումներին, որոնք կայացվել են սահմանված կարգով (ներկայացուցչական են) և բուհի ուսանողական ինքնակառավարման համակարգի իրավասության շրջանակում:

### **9.3. Ինքնակառավարման մարմնի լիազորությունները**

Ինքնակառավարման մարմինը՝ գործելով իր ներքին կանոնակարգի և սույն կանոնադրության հիման վրա, իրականացնում է հետևյալ լիազորությունները.

**9.3.1.** Իր գործունեության ոլորտում մշակում և իրականացնում է ծրագրեր և միջոցառումներ՝ ուղղված ուսանողական կյանքի, կրթական միջավայրի և ինքնակառավարման համակարգի լավարկմանը:

**9.3.2.** Ներկայացնում է իր ոլորտին առնչվող առաջարկություններ, դիրքորոշումներ և եզրակացություններ Ուսանողական խորհրդարանին և նախագահությանը՝ ուսանողական քաղաքականության ձևավորման և որոշումների ընդունման գործընթացներում:

**9.3.3.** Իր իրավունքների և պատասխանատվության սահմաններում հանդես է գալիս որպես ուսանողական համայնքի ներկայացուցիչ՝ իր ոլորտում արտահայտելով ուսանողների կարծիքը, առաջարկները և պահանջները:

**9.3.4.** Իր գործունեության շրջանակում կարող է նախաձեռնել աշխատանքային խմբերի, նախագծային թիմերի կամ հանձնախմբերի ձևավորում՝ կոնկրետ խնդիրների լուծման նպատակով:

**9.3.5.** Իր նախաձեռնությամբ կարող է համագործակցել բուհի կառավարման մարմինների, ամբիոնների, վարչական ստորաբաժանումների և արտաքին գործընկեր կազմակերպությունների հետ՝ իր ծրագրերի իրագործման համար:

**9.3.6.** Ուսանողական ինքնակառավարման մարմինն իրավասու է բուհի կառավարման բոլոր օղակներից ստանալ անհրաժեշտ տեղեկատվություն: Ստացված տեղեկատվությունը կարող է օգտագործվել միայն ուսանողական շահերի պաշտպանության և համակարգային բարելավման նպատակով՝ պահպանելով սվյալների գաղտնիությունը և բուհի ներքին կանոնակարգերը:

**9.3.7.** Իրականացնում է տեղեկատվական, վերլուծական և խորհրդատվական գործունեություն՝ ուսանողների իրազեկման, մասնակցության և պաշտպանվածության մակարդակը բարձրացնելու նպատակով:

**9.3.8.** Տարեկան հիմքով ներկայացնում է գործունեության հաշվետվություն նախագահությանը, ուսանողական խորհրդարանին, սվորողներին՝ իր ծրագրերի կատարողականի, անդամակցության և ազդեցության վերաբերյալ:

**9.3.9.** Կարող է հանդես գալ նոր առաջարկներով կամ ռազմավարական ուղղություններով՝ ուսանողական ինքնակառավարման համակարգի կատարելագործման և արդյունավետության բարձրացման նպատակով:

**9.3.10.** Ունի իրավունք ներկայացնել միջնորդություններ կամ զեկույցներ ՈւԽ նախագահությանը՝ ներքին գործընթացների բարելավման, համագործակցության կամ կարգավորման հարցերով:

#### **9.4. Ինքնակառավարման մարմնի կարգավիճակը և ձևավորման փուլերը**

9.4.1. Ուսանողական ինքնակառավարման մարմնի գործունեությունը ենթադրում է հստակ ձևավորման փուլեր՝ ըստ հաստատման, կայացման և վերանայման աստիճանի:  
ա) ուսանողական նախաձեռնություն,  
բ) ինքնակառավարման մարմին (Ժամանակավոր կարգավիճակով),  
գ) հաստատված ինքնակառավարման մարմին (լիարժեք կարգավիճակով),  
դ) վերակազմավորում,  
ե) լուծարում:

9.4.2. **Ուսանողական նախաձեռնություն** է համարվում ուսանողների կողմից ձևավորված ոչ պաշտոնական խումբը, որը հանդես է գալիս հստակ գաղափարով կամ առաջարկությամբ՝ ուղղված բուհի ուսանողական կյանքի, կրթական միջավայրի կամ ինքնակառավարման համակարգի որևէ ոլորտի զարգացմանը:

9.4.3. Նախաձեռնությունը կարող է գրավոր դիմումով ներկայացվել նախագահությանը՝ կցելով.

- գործունեության նպատակը և ինդիկատորները,
- նախնական գործողությունների պլանը (այդ թվում ենթադրական ծրագրերը),
- անդամների ցուցակը (առնվազն 5 ուսանող),

- Նախաձեռնության համակարգողի տվյալները:

9.4.4. Նախագահությունը 10 աշխատանքային օրվա ընթացքում քննարկում է դիմումը և կազմում դրական կամ բացասական եզրակացություն:

9.4.5. Նախաձեռնությունը դրական եզրակացություն տալու դեպքում այն ստանում է ժամանակավոր գործելու իրավունք մինչև մեկ ուսումնական տարի ժամկետով՝ որպես «ժամանակավոր ինքնակառավարման մարմին»:

9.4.6. Նախաձեռնությունը մերժվելու դեպքում հայտը ներկայացրած անձանց տրվում է գրավոր բացատրություն որտեղ հստակ նշվում է պատճառը(ները): Մերժման պատճառ կարող են հանդիսանալ հետևյալ դեպքերը՝

- ներկայացված նախաձեռնության նպատակը կամ խնդիրները հակասում են բուհի կամ ուսանողական ինքնակառավարման համակարգի կանոնադրական սկզբունքներին,
- նախաձեռնության առաջարկվող գործունեությունը ամբողջությամբ կամ մասնակիորեն կրկնում է արդեն գործող որևէ ինքնակառավարման մարմնի գործառույթները,
- ներկայացված ծրագիրը չունի հստակ նպատակ, գործողությունների տրամաբանություն կամ իրագործելիություն,
- անդամների թիվը կամ ներկայացվածության չափանիշները չեն բավարարում սույն կանոնակարգով սահմանված նվազագույն պահանջներին,
- հայտում առկա է անճշտություն, բացթողում կամ կեղծ տվյալ,
- նախաձեռնության գործունեությունը կարող է պարունակել քաղաքական, կրոնական կամ կուսակցական քարոզչության տարրեր, ինչպես նաև խտրականություն կամ անպատշաճ վարքագծի դրսևորումներ:

9.4.7. Եթե ուսանողական նախաձեռնությունը կրկնում է գործող մարմնի գործառույթները, սակայն կարող է նպաստել տվյալ ուղղությամբ արդեն գործունեություն իրականացնող ինքնակառավարման մարմնի արդյունավետ աշխատանքին, նախագահությունը պարտավոր է կատարել համապատասխան ուղղորդումներ՝ ապահովելով անհրաժեշտ ռեսուրսներ և պայմաններ, որպեսզի նախաձեռնությունը իրականացվի որպես ծրագիր գործող ինքնակառավարման մարմնի շրջանակում:

9.4.8. Մերժման որոշումը կարող է բողոքարկվել նախաձեռնողների կողմից՝ Վերահսկիչ հանձնաժողովին՝ ծանուցման պահից 10 աշխատանքային օրվա ընթացքում: Վերջինս 10 աշխատանքային օրվա ընթացքում պարտավոր է քննարկել բողոքը և ներկայացնել եզրակացություն նախագահությանը:

9.4.9. Եթե բողոքարկման արդյունքում վերահսկիչ հանձնաժողովը եզրակացնում է, որ մերժման հիմքերը անհիմն են, նախագահությունը պարտավոր է նախաձեռնությանը տրամադրել ժամանակավոր կարգավիճակ՝ սույն կանոնակարգի պահանջներին համապատասխան:

9.4.10. Ինքնակառավարման մարմինները չեն կարող ստեղծվել կամ գործել բուհի վարչական մարմինների կողմից:

#### 9.5. Ինքնակառավարման մարմին (Ժամանակավոր կարգավիճակով)

9.5.1. Ժամանակավոր կարգավիճակը տրամադրվում է նախագահության որոշմամբ՝ առավելագույնը 1 տարով՝ մշտադիտարկման պայմանով:

9.5.2. Որոշումն ընդունելու պահից սկսած 30 օրվա ընթացքում տվյալ մարմնի ներկայացուցիչները օրինակելի ձևաչափով նախագահության հաստատման են ներկայացնում տվյալ ինքնակառավարման մարմնի ներքին կանոնակարգը սույն կանոնադրությանը համապատասխան:

9.5.3. Նախագահության կողմից կանոնակարգի հաստատումից հետո դրան համապատասխան կազմակերպվում է տվյալ ինքնակառավարման մարմնի նախագահի ընտրությունները: Ընտրված նախագահը հանդիսանում է նախագահության խորհրդի անդամ առանց քվոտայի իրավունքի:

9.5.4. Ժամանակավոր ինքնակառավարման մարմինը ի դեմս նախագահի պարտավորվում է՝

- գործել ուսանողական ինքնակառավարման համակարգի կանոնադրության և ներքին կանոնակարգին համապատասխան,
- ներկայացնում է տարեկան գործողությունների ծրագիր,
- անընդհատ կերպով ներկայացնում է ընթացիկ հաշվետվություն,
- պարտավոր է ապահովել նախագահության նիստերի որոշումների կատարումը, եթե դրանք չեն բողոքարկվում վերահսկիչ հանձնաժողով:

9.5.5. Ժամանակավոր կարգավիճակը տրվում է առավելագույնը մեկ տարի ժամկետով, որի ավարտին մարմինը պարտավոր է ներկայացնել գործունեության հաշվետվություն, որը պետք է ներառի՝

- իրականացված ծրագրերի, նախաձեռնությունների և միջոցառումների ամբողջական ցանկը և ուսանողի ակտիվության գնահատման համակարգի տվյալները (բավարար է հանդիսանում՝ մեկ կիսամյակի ընթացքում իրականացված առնվազն երեք ծրագիր կամ միջոցառում, կամ իր նախաձեռնությունների շրջանակում առնվազն հիսուն (50) ուսանողի ներգրավումը մեկ ուսումնական տարվա ընթացքում,)
- իր կողմից սահմանած տարեկան գործողությունների պլանի կատարողականությունը (բավարար է հանդիսանում առնվազն 80% կատարողականությունը)
- անդամակցության դինամիկան՝ տարվա ընթացքում գրանցված և մասնակցած անդամների քանակը, ինչպես նաև մասնակցության

պարբերականությունը, (բավարար է հանդիսանում 1 կիսամյակի ընթացքում 4 նիստի կազմակերպումը առկա, որոնց ներկա է անդամների առնվազն 1/3)

- ֆինանսական հաշվետվությունը՝ ստացված և ծախսված միջոցների (եթե առկա են) մանրամասներով և փաստաթղթային հիմնավորումներով,
- համագործակցության արդյունքները՝ այլ ինքնակառավարման մարմինների, բուհի ստորաբաժանումների կամ արտաքին կառույցների հետ իրականացված համատեղ նախաձեռնությունների նկարագրությամբ, (բավարար է հանդիսանում նվազագույնը 1 համագործակցային նախագիծը)
- գնահատում և վերլուծություն սեփական գործունեության ուժեղ և թույլ կողմերի վերաբերյալ, ներառյալ առաջիկա տարվա բարելավման առաջարկները,
- ուսանողների հետ կապի և արձագանքման մեխանիզմների ամփոփում՝ ստացված առաջարկների, բողոքների կամ կարծիքների հիման վրա կատարված գործողությունների մասին,
- ապացույցներ կամ ցուցանիշներ գործունեության ազդեցության վերաբերյալ՝ բուհական միջավայրի, ուսանողական համայնքի կամ արտաքին գործընկերների մակարդակով:
- չունի ընթացիկ կարգապահական վարույթ կամ պատիժ, որը հավաստվում է վերահսկիչ հանձնաժողովի որոշմամբ,

9.5.6. Ներկայացված հաշվետվության հիման վրա նախագահությունը կայացնում է որոշում ձևավորելու լիարժեք կարգավիճակով ինքնակառավարման մարմին կամ դադարեցնելու տվյալ մարմնի գործունեությունը:

9.5.7. Ժամանակավոր կարգավիճակի ընթացքում անգործության, կանոնադրական, էթիկական կամ ֆինանսական խախտումների դեպքում նախագահությունը կարող է վերահսկիչ հանձնաժողով ներկայացնել միջնորդություն տվյալ մարմնի գործունեությունը դադարեցնելու մասին, եթե առկա են օբյեկտիվ հիմնավորումներ:

9.5.8. Մերժման որոշումը կարող է բողոքարկվել վերահսկիչ հանձնաժողովին՝ ծանուցման պահից 10 աշխատանքային օրվա ընթացքում: Վերջինս 30 օրվա ընթացքում պարտավոր է քննարկել բողոքը և ներկայացնել եզրակացություն նախագահությանը:

9.5.9. Եթե բողոքարկման արդյունքում վերահսկիչ հանձնաժողովը եզրակացնում է, որ մերժման հիմքերը անհիմն են, նախագահությունը պարտավոր է նախաձեռնությանը տրամադրել կարգավիճակ՝ սույն կանոնակարգի պահանջներին համապատասխան:

## **9.6 Վերակազմավորում կամ լուծարում**

9.6.1. Ինքնակառավարման մարմնի գործունեությունը կարող է դադարեցվել կամ վերակազմավորվել բացառապես այն դեպքում, երբ դրա համար առկա են օբյեկտիվ հիմնավորումներ:

9.6.2. Գործունեության դադարեցման կամ վերակազմավորման հիմքեր կարող են լինել՝

- Անգործության փաստը՝ մեկ ուսումնական տարվա ընթացքում որևէ ծրագիր կամ նախաձեռնություն չիրականացնելու դեպքում,
- Տարեկան հաշվետվության չներկայացումը սահմանված ձևաչափով և ժամկետներում
- Էթիկական կամ կարգապահական խախտումներ՝ որոնք լրջորեն վնասում են ուսանողական ինքնակառավարման հեղինակությանը վերահսկիչ հանձնաժողովի որոշմամբ,
- Գործառույթների կրկնություն՝ երբ մարմինը շեղվելով իր ներքին կանոնակարգերով սահմանած նպատակներից և խնդիրներից լիովին կամ մասնակիորեն կրկնում է որևէ այլ կառույցի գործունեությունը:
- Մարմնի կազմում առկա է անդամների թվի կտրուկ նվազում (հինգից պակաս ակտիվ անդամ), որի հետևանքով խաթարվում է մարմնի բնականոն գործունեությունը,
- Ֆինանսական կամ կազմակերպչական թափանցիկության խախտումներ, ինչպես նաև հաշվետվական տվյալների կեղծման փաստեր՝ հաստատված վերահսկիչ հանձնաժողովի կողմից,
- Գործունեության քաղաքականացում կամ կուսակցական, կրոնական կամ խտրական բնույթի գործունեություն իրականացնելը,
- Ուսանողների իրավունքների կամ հավասար մասնակցության հնարավորությունների խախտումը մարմնի կողմից,
- Բուհի կամ ուսանողական ինքնակառավարման համակարգի հեղինակությանը վնաս հասցնող գործողություններ, հայտարարություններ կամ հրապարակումներ,
- Ներքին կառավարման համակարգի խաթարում՝ մարմնի ղեկավարության կողմից լիազորությունների չարաշահման կամ անդամների նկատմամբ անհիմն սահմանափակումների դրսևորման հետևանքով:
- Մարմնի գործունեության շեղումը իր կանոնադրական նպատակներից՝ այն դեպքերում, երբ մարմինը փաստացի դադարում է ծառայել ուսանողական համայնքի ընդհանուր շահերին և սկսում է գործել մեկ անձի, խմբի կամ ղեկավարի անձնական, քաղաքական կամ շահադիտական հետաքրքրություններին համապատասխան:

#### 9.6.3. Գործունեության դադարեցման կամ վերակազմավորման գործընթացը նախաձեռնվում է՝

- Տվյալ մարմնի կողմից (ինքնադադարեցում): Մարմնի կողմից իր գործունեության դադարեցման վերաբերյալ գրավոր որոշման ընդունումը անդամների 2/3-ի պահանջով,
- Նախագահության որոշմամբ, այն դեպքերում, երբ առկա են օբյեկտիվ ցուցանիշներ և փաստեր, որոնց հիման վրա մարմնին նախապես տրվել են գրավոր զգուշացումներ կամ նկատառումներ, սակայն սահմանված ժամկետներում դրանք չեն վերացվել կամ կրկնվել են:

9.6.4. Որոշումն ընդունվելու պահից դրա մասին ծանուցվում են ինքնակառավարման համակրգի բոլոր անդամները: Եթե որոշումը 30 օրվա ընթացքում չի բողոքարկվում վերահսկիչ հանձնաժողով այն համարվում է ուժի մեջ մտած:

9.6.5. Վերակազմավորում է համարվում ինքնակառավարման մարմնի ներքին կանոնակարգի փոփոխությունը, որն իրականացվում է տվյալ մարմնի գործունեության արդյունավետության բարձրացման, գործառույթների հստակեցման նպատակով՝ առանց մարմնի գործունեությունը դադարեցնելու:

9.6.6. Վերակազմավորման անհրաժեշտությունը կարող է առաջանալ հետևյալ դեպքերում.

1. Մարմնի գործունեությունը մասամբ չի ապահովում իր նպատակային խնդիրների կատարողականը կամ պահանջում է կառուցվածքային հստակեցում:
2. Մարմնի գործառույթները չեն համապատասխանում ժամանակի պահանջներին կամ ուսանողական համայնքի նոր ձևավորված կարիքներին:
3. Առկա են ներքին կառավարման կամ հաղորդակցման խնդիրներ, որոնք խոչընդոտում են գործունեության շարունակականությանը:
4. Անհրաժեշտ է գործունեության ընդլայնում՝ նոր բաժինների, հանձնախմբերի կամ ծրագրերի ձևավորմամբ:
5. Նախորդ հաշվետու շրջանի ընթացքում արձանագրվել են կառուցվածքային թերացումներ կամ կրկնվող գործառույթներ այլ մարմինների հետ:
6. Նախագահության կամ վերահսկիչ հանձնաժողովի կողմից տրված նկատառումները պահանջում են կառուցվածքային կամ գործառութային վերանայում:

9.6.7. Վերակազմավորման ռազմավարությունը ներկայացվում է տվյալ մարմնի կողմից: Վերակազմավորման առաջարկին կցվում են.

- փոփոխությունների հիմնավորումն ու նպատակը,
- նախատեսվող նոր կառուցվածքը և գործառույթները,
- անցումային պլանը՝ գործող ծրագրերի շարունակականությունը ապահովելու համար:

9.6.8. Վերակազմավորման գործընթացը պետք է ավարտվի առավելագույնը 30 աշխատանքային օրվա ընթացքում, որը կարող է երկարացվել ևս 10 աշխատանքային օրով՝ նախագահության հիմնավոր որոշմամբ:

9.6.9. Վերակազմավորման գործընթացը համարվում է ավարտված, եթե նախագահության կողմից հաստատվում է տվյալ մարմնի նոր կանոնակարգը, որոշումը ընդունվում է նախագահության քվեարկությամբ՝ պարզ մեծամասնությամբ:

9.6.10. Վերակազմավորման արդյունքում ինքնակառավարման մարմնի նոր կանոնակարգը և աշխատելաճը չպետք է հակասեն սույն կանոնադրությամբ սահմանված պահանջներին:

9.6.11. Վերակազմավորման գործընթացի ընթացքում մարմինը շարունակում է գործել իր նախորդ (գործող) ներքին կանոնակարգով և պահպանում է իր կարգավիճակը մինչև վերակազմավորման գործընթացի ավարտը, բացառությամբ այն դեպքերի, երբ նախագահության որոշմամբ սահմանվում է այլ կարգ՝ հաշվի առնելով կոնկրետ հանգամանքները կամ վերահսկիչ հանձնաժողովի առաջարկությունը:

9.6.12. Ինքնակառավարման մարմնի լուծարում է համարվում նրա գործունեության լիարժեք դադարեցումը՝ որպես ուսանողական ինքնակառավարման համակարգի ենթակառույցի, ինչի արդյունքում մարմինը կորցնում է իր լիազորությունները, կարգավիճակը և ներկայացուցչական իրավունքը:

9.6.13. Լուծարման պահից մարմնի բոլոր իրավական և ֆինանսական պարտավորությունները դադարում են, իսկ ընթացիկ ծրագրերը կարող են փոխանցվել նախագահության որոշմամբ այլ գործող ինքնակառավարման մարմնի կամ աշխատանքային խմբի:

9.6.14. Լուծարված մարմնի անվանումը, խորհրդանիշները (լոգո, նշան, կարգախոս և այլ նույնացուցիչ տարրեր), ինչպես նաև նրա կողմից նախկինում օգտագործված պաշտոնական էլեկտրոնային հասցեները և հաղորդակցման հարթակները չեն կարող կրկին օգտագործվել կամ գրանցվել որևէ այլ խմբի, նախաձեռնության կամ հասարակական կազմակերպության կողմից առանց նախագահության գրավոր համաձայնության:

## **9.7. Ուսանողական ինքնակառավարման մարմնի անդամի իրավունքները**

9.7.1. Մասնակցել իր մարմնի գործունեությանը որոշումների ընդունմանը՝ լիիրավ ձայնի իրավունքով:

9.7.2. Ներկայացնել առաջարկներ, դիտարկումներ և նախագծեր՝ ուղղված ուսանողական կյանքի, կրթական միջավայրի կամ ինքնակառավարման համակարգի բարելավմանը:

9.7.3. Ներկայացնել ծրագրային առաջարկներ (դրա ընդունման կամ մերժման վերաբերյալ ստանալ գրավոր բացատրություններ)՝ տվյալ մարմնի նպատակների և լիազորությունների շրջանակում:

9.7.4. Լինել նախաձեռնության հեղինակ և ցանկության դեպքում հեղինակային իրավունքոց ելնելով իրականացնել դրա ղեկավարումը՝ ապահովելով հավասար մասնակցության և թափանցիկության սկզբունքները:

9.7.5. Ընդգրկվել այլ ծրագրերի կազմակերպման ղեկավարման աշխատանքներին այդ թվում՝ նայլ և այլ մարմինների կողմից իրականացվող ծրագրերին:

9.7.6. Ստանալ ամբողջական և ժամանակին տեղեկատվություն իր մարմնի գործունեության, որոշումների, ծրագրերի և ֆինանսական միջոցների օգտագործման մասին:

9.7.7. Ստանալ խորհրդատվություն և աջակցություն բուհի և ՈւԽ-ի կողմից իր նախաձեռնությունների իրականացման համար:

9.7.8. Ներկայացնել իր կարծիքը ուսանողական ինքնակառավարման աշխատանքների, որոշումների կամ նախագծերի վերաբերյալ, անհրաժեշտության դեպքում բողոքարկել դրանք վերահսկիչ հանձնաժողով սահմանված կարգով պահպանելով Էթիկական նորմերը:

9.7.9. Օգտվել բուհի տրամադրած ռեսուրսներից (տարածք, տեխնիկա, տեղեկատվական հարթակներ և այլն)՝ իր մարմնի կամ նախաձեռնության նպատակների շրջանակում:

9.7.10. Առաջադրվել և ընտրվել ուսանողական ինքնակառավարման համակարգի ղեկավար պաշտոններում, բացառությամբ՝ վերահսկիչ հանձնաժողովի:

9.7.11. Համապատասխան ընթացակարգերի անդամակցել բուհի կառավարման օղակներին չչեղվելով ուսանողների լավագույն շահերը ներկայացնելու իր առաքելությունից:

9.7.12. Ցանկության դեպքում հրաժարվել անդամակցությունից՝ գրավոր դիմումով՝ պահպանելով ընթացակարգային կանոնները:

9.7.13. Հավակնել և սահմանված կարգով ստանալ պարգևատրումներ և խրախուսման միջոցներ՝ կատարած ներդրման համապատասխան:

## **9.8. Ուսանողական ինքնակառավարման մարմնի անդամի պարտականությունները**

9.8.1. Իր գործունեությունը իրականացնել սույն կանոնադրության, ինքնակառավարման համակարգի կարգավորումների, տվյալ մարմնի ներքին կանոնակարգին և Էթիկական նորմերին համապատասխան:

9.8.2. Պարտաճանաչ կերպով ապահովել իր մասնակցությունը մարմնի նիստերին, նախաձեռնություններին և ծրագրերին՝ չհետաձգելով կամ չխոչընդոտելով դրանց ընթացքը: Հետևել իր կողմից ստանձնած պարտականությունների կատարմանը՝ ապահովելով բարձր պատասխանատվություն և նախաձեռնողականություն:

9.8.3. Պահպանել բուհի և ուսանողական ինքնակառավարման հեղինակությունը՝ զերծ մնալով գործողություններից, որոնք կարող են վնասել դրանց իմիջը:

9.8.4. Իր նախաձեռնությունները և ծրագրերը իրականացնել թափանցիկ և հաշվետու ձևով՝ ներկայացնելով իրականացված աշխատանքների և արդյունքների մասին

տեղեկություններ:

9.8.5. Նպաստել թիմային աշխատանքի արդյունավետությանը՝ հարգելով բազմակարծությունը և գործընկերային հարաբերությունները: Նպաստել բուհի ուսանողական համայնքի համերաշխության և համագործակցության զարգացմանը:

9.8.6. Չօգտագործել ինքնակառավարման հարթակները քաղաքական, կրոնական կամ անձնական նպատակներով:

9.8.7. Պահպանել ներքին փաստաթղթերի գաղտնիությունը՝ առանց ղեկավարության կամ նախագահության թույլտվության չհրապարակել ներքին բնույթի տեղեկատվություն:

9.8.9. Մասնակցել ուսանողի ակտիվության գնահատման համակարգին՝ ապահովելով իր ներգրավվածությունն ու գործունեության փաստացի արձանագրումը սահմանված կարգով:

9.8.10. Պատասխանատվություն կրել իր գործողությունների կամ անգործության հետևանքով առաջացած վնասների կամ խախտումների համար:

9.8.11. Խնամքով վերաբերվել բուհի, ուսանողական ինքնակառավարման մարմինների և այլ ուսանողական կառույցների կողմից տրամադրված գույքին, նյութական և ֆինանսական միջոցներին՝ ապահովելով դրանց նպատակային օգտագործումը և պահպանությունը:

## **9.9. Ինքնակառավարման մարմնի ղեկավարի իրավունքներն ու պարտականությունները**

9.9.1. Ինքնակառավարման մարմնի ղեկավարը հանդիսանում է տվյալ մարմնի բարձրագույն ներկայացուցիչ և պատասխանատու: Իրավասու է ներկայացնել մարմինը բուհի, ուսանողական խորհրդարանի, ինչպես նաև արտաքին կառույցների և կազմակերպությունների առջև:

9.9.2. Իրականացնել մարմնի ընդհանուր ղեկավարությունը՝ ապահովելով դրա արդյունավետ և շարունակական գործունեությունը: Կազմակերպել և նախագահել մարմնի նիստերը, ստորագրել արձանագրությունները և ընդունված որոշումները:

9.9.3. Պարտավոր է ենթարկվել ինքնակառավարման մարմնի նիստերում քվեարկությամբ կայացված որոշումներին՝ անկախ անձնական դիրքորոշումից:

9.9.4. Վերահսկել մարմնի ենթակառուցվածքների (հանձնախմբեր, բաժիններ, ծրագրային խմբեր) բնականոն գործունեությունը՝ ապահովելով դրանց արդյունավետ աշխատանքը, անհրաժեշտ կազմակերպչական, տեղեկատվական և նյութական ռեսուրսներով:

9.9.5. Սահմանված կարգով ստանալ անհրաժեշտ աջակցություն, տեղեկատվություն և ռեսուրսներ՝ բուհի և նախագահության կողմից իր մարմնի ծրագրերի արդյունավետ իրականացումն ապահովելու համար: Խորհրդակցել ՈւԽ-ի, նախագահության և վերահսկիչ հանձնաժողովի հետ՝ մարմնի գործունեության, ֆինանսական և էթիկական հարցերի վերաբերյալ:

9.9.6. Իր լիազորությունների սահմաններում ընդունել որոշումներ՝ առանց վերադաս մարմինների հաստատման, եթե դրանք չեն հակասում սույն կանոնակարգին:

9.9.7. Միջնորդել անդամներին խրախուսման, պարգևատրության կամ բարձր գնահատման համար՝ ըստ գործունեության արդյունքների:

9.9.8. Պարտավոր է ապահովել մարմնի գործունեության թափանցիկությունը, ապահովել հաշվետվողականություն ուսանողական խորհրդարանին, նախագահությանը և ուսանողական հանրության առջև: Պատրաստել և ներկայացնել մարմնի տարեկան գործունեության հաշվետվությունը սահմանված ժամկետներում:

9.9.9. Պարտավոր է սպասարկել բուհի և ուսանողական ինքնակառավարման ընդհանուր շահը՝ խուսափելով անհատական կամ խմբային շահերի սպասարկումից: Հետևել էթիկական և կարգապահական նորմերի պահպանմանը մարմնի ներսում կանխելով շահերի բախում կամ անարդար վերաբերմունք:

9.9.10. Նպաստել ուսանողների ներգրավվածությանը, նոր անդամների ներգրավմանն ու նրանց կարողությունների զարգացմանը:

9.9.11. Պատասխանատվություն կրել մարմնի անունից արված հայտարարությունների, հրապարակումների և որոշումների համար:

9.9.12. Պատասխանատու կերպով մասնակցել նախագահության նիստերին՝ ներկայացնելով իր մարմնի շահերն ու դիրքորոշումը, ապահովելով կառուցողական քննարկում և համագործակցություն, ինչպես նաև չխոչընդոտել նախագահության աշխատանքների բնականոն ընթացքին և ընդունված որոշումների իրականացմանը:

9.9.13. Համագործակցել ուսանողական խորհրդարանի նախագահի, փոխնախագահի և մյուս մարմինների ղեկավարների հետ՝ ապահովելով համակարգային կապը:

9.9.14. Պարտավոր է ապահովել ուսանողների հետ կապի, դիմումների ընդունման և արձագանքման հստակ մեխանիզմների մատչելի միջավայր:

9.9.15. Պահպանել ֆինանսական միջոցների նպատակային և թափանցիկ օգտագործումը՝ համաձայն հաստատված ծրագրերի: Խախտումների կամ անարդյունավետության դեպքերում պարտավոր է ձեռնարկել համապատասխան կազմակերպչական կամ կարգապահական միջոցներ:

9.9.16. Ուսանողը չի կարող միաժամանակ ղեկավարել մեկից ավելի ինքնակառավարման մարմիններ:

### **9.10. Ինքնակառավարման մարմնի ղեկավարի լիազորությունները կարող են դադարեցվել հետևյալ հիմքերով`**

9.10.1. Ինքնակամ հրաժարականով

- ղեկավարի կողմից ներկայացված գրավոր դիմումով` հասցեագրված ուսանողական խորհրդարանի նախագահությանը,
- հրաժարականը ուժի մեջ է մտնում դիմումը ներկայացնելուց 10 աշխատանքային օր հետո:

9.10.2. Ուսանողի կարգավիճակի դադարեցմամբ

- ղեկավարի լիազորությունները դադարեցվում են, եթե նա դադարում է ունենալ բուհի ուսանողի կարգավիճակ կամ գտնվում է ակադեմիական արձակուրդում:

9.10.3. Համակարգային անգործության պարագայում նախագահության որոշմամբ`

- մեկ ուսումնական կիսամյակի ընթացքում հաստատված գործողությունների պլանի 50%-ից պակաս կատարողականության դեպքում,
- անդամների կամ նախագահության կողմից արձանագրված համակարգային անգործության կամ պարտականությունների չկատարման փաստերի առկայությամբ, ուսանողի ակտիվության գնահատման համակարգում ունենա առնվազն միջին ակտիվություն:

9.10.4 Եթիկական կամ կարգապահական խախտմամբ վերահսկիչ հանձնաժողովի որոշմամբ պարտականությունների չկատարման իրավունքների չարաշահման պարագայում

- Բուհի կարգապահական կամ եթիկայի հանձնաժողովի որոշմամբ` հաստատված խախտման դեպքում,
- Ուսանողական ինքնակառավարման հեղինակությանը վնաս հասցնող վարքագծի դեպքում:
- Քաղաքական կամ կրոնական գործունեության իրականացման դեպքում, եթե ղեկավարը օգտագործում է իր պաշտոնական դիրքը քաղաքական կամ կրոնական քարոզչության, ապատեղեկատվության տարածման կամ խմբային շահերի սպասարկման նպատակով:
- Ֆինանսական կամ կազմակերպչական չարաշահման դեպքում` ֆինանսական միջոցների ոչ նպատակային օգտագործման, հաշվետվությունների թաքցման կամ փաստաթղթերի կեղծման դեպքերում:

9.10.5. Անդամների անվստահությամբ առնվազն ձայնի իրվունք ունեցող անդամների կեսից ավելի գրավոր նախաձեռնությամբ:

9.10.6. Ինքնակառավարման մարմնի նախագահի լիազորությունների դադարեցման պահից սկսած 30 օրյա ժամկետում սահմանված ընթացակարգին համապատասխան կազմակերպվում է տվյալ ինքնակառավարման մարմնի նախագահի ընտրությունները:

9.10.7. Լիազորությունների դադարեցման պահից մինչև նոր ղեկավարի ընտրությունը, մարմնի ղեկավարի պարտականությունները կատարում է նախագահության կողմից նշանակված ժամանակավոր պաշտոնակատարը (ԺՊ): ԺՊ-ի նշանակումն իրականացվում է հետևյալ սկզբունքով՝ տվյալ մարմնի անդամների շարքից ուսանողի ակտիվության գնահատման համակարգում 5 ամենաբարձր միավոր ունեցող ուսանողներից մեկը:

### **9.11. Ինքնակառավարման մարմնի գործունեության հաշվետվողականության և վերահսկողության համակարգը**

9.11.1. Ինքնակառավարման մարմնիների հաշվետվողականության համակարգը նպատակ ունի ապահովել դրանց գործունեության թափանցիկությունը, արդյունավետությունը և ուսանողական համայնքի առջև հաշվետու լինելը: Վերահսկողությունն իրականացվում է ուսանողական խորհրդարանի, նախագահության, վերահսկիչ հանձնաժողովի, բուհի ղեկավարության կողմից՝ համաձայն սույն կանոնակարգի:

9.11.2. Յուրաքանչյուր ինքնակառավարման մարմին պարտավոր է ներկայացնել գործունեության հաշվետվություն՝ տարեկան առնվազն մեկ անգամ: Տարեկան հաշվետվությունը պարտադիր պետք է ներառի՝

- իրականացված ծրագրերի և միջոցառումների բովանդակային նկարագրերը,
- ծրագրերի իրականացման ցուցանիշները (մասնակիցների թիվ, բալային արժեքները ըստ ուսանողի ակտիվության գնահատման համակարգի օբյեկտիվ ցուցիչների, բյուջե և այլն),
- իրենց ներքին կանոնակարգով սահմանված նպատակների և խնդիրների կատարման աստիճանը և ծրագրերի համապատասխանությունը դրանց,
- ֆինանսական միջոցների օգտագործման հաշվետվությունը,
- ուսանողների հետադարձ արձագանքման և համագործակցության արդյունքները,
- առաջարկություններ հաջորդ տարվա գործունեության բարելավման ուղղությամբ:

9.11.3. Հաշվետվությունը ներկայացվում է նախագահության կողմից հաստատված ժամկետում ամբողջ ուսանողությանը, իսկ գրավոր ձևաչափով այն հրապարակվում է ինքնակառավարման համակարգի պաշտոնական հարթակներում:

9.11.4. Անհրաժեշտության դեպքում վերահսկող մարմինները կարող են պահանջել միջանկյալ հաշվետվություն (կիսամյակային կամ թեմատիկ ձևաչափով):

- 9.11.5. Ինքնակառավարման մարմնի տարեկան հաշվետվության հիման վրա վերահսկող մարմինները կարող են ներկայացնել տվյալ մարմնի գործունեության վերաբերյալ գնահատական, առանձնացված հատուկ կարծիքներ, նկատառումներ:
- 9.11.6. Վերահսկիչ հանձնաժողովը կարող է կազմակերպել դիտարկումներ, հարցումներ կամ ուսանողական կարծիքի ուսումնասիրություններ՝ մարմինների աշխատանքի գնահատման նպատակով:
- 9.11.7. Վերահսկող մարմինների կողմից տրված անբավարար գնահատականի հիման վրա, վերահսկիչ հանձնաժողովը կարող է սահմանել կարգապահական տույժեր, այդ թվում՝ տվյալ մարմնի ղեկավարի լիազորությունների դադարեցում՝ նոր ընտրությունների կազմակերպում:
- 9.11.8. Ուսանողները կարող են ներկայացնել գրավոր դիտարկումներ կամ առաջարկություններ հաշվետվությունների վերաբերյալ՝ նախագահությանը կամ վերահսկիչ հանձնաժողովին: Նախագահությունը և վերահսկիչ հանձնաժողովը պարտավոր է ապահովել արձագանքման և հետադարձ կապի հստակ մեխանիզմ՝ ապահովելով ուսանողական կարծիքի ազդեցությունը համակարգի բարելավման վրա:

## **Յոզված 10. Վերահսկիչ հանձնաժողով**

10.1.1. Վերահսկիչ հանձնաժողովը հանդիսանում է ուսանողական ինքնակառավարման համակարգի անկախ վերահսկող մարմինը, որը ապահովում է համակարգի գործունեությունը համապատասխան ՀՀ օրենսդրությանը, բուհի կանոնադրությանը, սույն կանոնակարգին, ինքնակառավարման համակարգի ներքին կարգավորումներին:

## **10.2. Ձևավորման կարգը**

10.2.1. Վերահսկիչ հանձնաժողովը ձևավորվում է ինքնաառաջադրման սկզբունքով: Առաջադրվել կարող են այն անձինք, ովքեր նախկինում ունեցել են ԵՊԲՀ ուսանողական ինքնակառավարման համակարգում ղեկավար պաշտոն՝ նախագահ, ով ծավալել է նվազագույնը 1 տարվա գործունեություն, սակայն տվյալ պահին որևէ պաշտոնական կարգավիճակ չունեն ինքնակառավարման համակարգի որևէ մարմնում:

10.2.2. Վերահսկիչ հանձնաժողովի անդամը կարող է չունենալ ուսանողի կարգավիճակ:

10.2.3. Ինքնաառաջադրված թեկնածուները գրավոր դիմումով ներկայացնում են իրենց թեկնածությունը նախագահությանը: Նախագահությունը սահմանված ժամկետում ճշտում է անձի տվյալների հավաստիությունը և ձևավորում կազմը:

10.2.4 Նախագահությունը սահմանում է դիմումների ներկայացման ժամկետ նախորդ գումարման վերահսկիչ հանձնաժողովի լիազորությունների ավարտից առնվազն 2 ամիս առաջ:

10.2.5. Վերահսկիչ հանձնաժողովը չունի անդամակցության քանակական սահմանափակում:

10.2.6. Անձինք, որոնք առաջադրվում են 2 տարվա ժամկետով՝ և չունեն վերաառաջադրվելու հնարավորությամբ:

10.2.7. Հանձնաժողովի կազմի մեջ չեն կարող ընդգրկվել անձինք, որոնք՝ հեռացվել են ինքնակառավարման համակարգի զբաղեցրած պաշտոնից կարգապահական վարույթով:

10.2.8. Վերահսկիչ հանձնաժողովը իր առաջին նիստում իր կազմից ընտրում է նախագահ և քարտուղար՝ պարզ մեծամասնությամբ:

10.2.9. Վերահսկիչ հանձնաժողովում այն անդամների թիվը, ովքեր համարվում են նաև հիմնադրամի աշխատակից, չպետք է գերազանցի կազմի ընդհանուր անդամների 25%:

### **10.3. Վերահսկիչ հանձնաժողովի լիազորությունները**

Վերահսկիչ հանձնաժողովը՝

10.3.1. Վերահսկում է ուսանողական ինքնակառավարման համակարգի մարմինների գործունեության օրինականությունը, արդյունավետությունը և թափանցիկությունը:

10.3.2. Ուսումնասիրում է բողոքներ, դիմումներ, միջնորդություններ և հաղորդումներ՝ կապված ուսանողական ինքնակառավարման մարմինների գործունեության կամ անդամների իրավունքների խախտման դեպքերի հետ:

10.3.3. Կարող է նախաձեռնել ներքին քննություններ կամ դիտարկումներ՝ սեփական նախաձեռնությամբ կամ նախագահության, խորհրդարանի կամ ուսանողության պահանջով:

10.3.4. Իրավասու է պահանջել անհրաժեշտ փաստաթղթեր և տեղեկություններ բոլոր ուսանողական ինքնակառավարման միավորներից՝ սահմանված ժամկետում:

10.3.5. Իրականացնում է պարբերական դիտարկումներ ուսանողական ինքնակառավարման համակարգի ընդհանուր արդյունավետության վերաբերյալ և ներկայացնում բարելավման առաջարկություններ:

10.3.6. Տարեկան հիմքով կազմում և ներկայացնում է համապարփակ զեկույց՝ ներառելով դիտարկումների արդյունքները, արձանագրված խախտումները և առաջարկությունները:

10.3.7. Հանձնաժողովի կողմից որոշումների ընդունումը կատարվում է անդամների ձայների պարզ մեծամասնության հաշվով:

### **10.4. Վերահսկիչ հանձնաժողովի իրավական գործիքակազմը**

Վերահսկիչ հանձնաժողովը, իր լիազորությունների շրջանակում, կարող է իրականացնել հետևյալ գործողությունները.

#### **10.4.1. Առաջարկություն**

Հանձնաժողովը կարող է ներկայացնել առաջարկություններ՝ ուղղված ուսանողական ինքնակառավարման համակարգի բարելավմանը, կարգավորումների կատարելագործմանը կամ գործունեության արդյունավետության բարձրացմանը: Այս առաջարկությունները.

- ունեն խորհրդատվական բնույթ,
- կարող է ձևավորվել սյուբյեկտիվ դիտարկումների հիման վրա,
- ուղարկվում են համապատասխան մարմիններին կամ նախագահությանը,
- ենթակա են պարտադիր արձագանքման այն օղակի կողմից որին ուղղված են:

#### **10.4.2. Եզրակացություն**

Հանձնաժողովը կարող է կազմել եզրակացություն՝ հիմնվելով փաստերի, նյութերի և վերլուծության վրա: Եզրակացությունը կարող է լինել.

ա) դրական՝ հաստատելով, որ խախտումներ չեն արձանագրվել,

բ) բացասական՝ արձանագրելով խախտումներ և առաջարկելով կարգապահական կամ կազմակերպչական արձագանք:

Եզրակացությունը.

- չի հանդիսանում պատժիչ ակտ,
- օգտագործվում է որպես փաստական հիմք նախագահության կամ խորհրդարանի որոշումների ընդունման համար,
- բացասական եզրակացության դեպքում այն պարտադիր ենթակա է արձագանքման տվյալ մարմնի կողմից, որի վերաբերյալ այն տրվել է :

#### **10.4.3. Քննական որոշում (պարտադիր կատարման ենթակա)**

Խախտումների, համակարգային անգործության կամ կանոնադրական պահանջների խախտման փաստերի դեպքում, ուսանողների դիմումների հիման վրա վերահսկիչ հանձնաժողովը կարող է կայացնել քննական որոշում, որը պարտադիր է կատարման համար:

Քննական որոշումները կարող են վերաբերվել հետևյալ դեպքերին.

- ֆինանսական, էթիկական կամ կարգապահական խախտումներ,
- ուսանողական իրավունքների և հավասար մասնակցության և խրախուսման սկզբունքների խախտում,
- ուսանողական մարմնի գործունեության, անգործություն կամ լիազորությունների չարաշահում դեպքերին:

Քննական որոշմամբ հանձնաժողովը կարող սույն կանոնադրության և ներքին կարգավորումների համապատասխան կայացնել հետևյալ որոշումները

- պարտավորեցնել տվյալ մարմին կամ պաշտոնատար անձին վերացնել հայտնաբերված խախտումները սահմանված ժամկետում,
- տվյալ ինքնակառավարման մարմնի ղեկավարի լիազորությունների դադարեցում և ընտրությունների նշանակում,
- մարմնի վերակազմավորման կամ լուծարման,
- կարգապահական տույժերի սահմանմանում այդ թվում նաև ռեսուրսների օգտագործման արգելք:

Քննական որոշումները ենթակա են պարտադիր կատարման:

#### **10.4.4. Միջնորդություն**

Վերահսկիչ հանձնաժողովը կարող է ներկայացնել միջնորդություն այն դեպքերում, երբ իր կողմից ընդունված որոշումները կամ տրված հանձնարարականները չեն կատարվել սահմանված ժամկետներում կամ կատարվել են ոչ պատշաճ ձևով:

Միջնորդությունը կարող է պարունակել հանձնաժողովի կողմից արձանագրված խախտումների մանրամասն նկարագրությունը, չկատարման պատճառների վերլուծությունը և առաջարկվող միջոցառումները:

Միջնորդությունը ներկայացվում է.

- Ուսանողական ինքնակառավարման համակարգի բարձրագույն օղակներին (ՈւԼԽ և Նախագահություն),
- Բուհի ղեկավարության և կառավարման խորհուրդներին:

#### **10.5. Գործունեության սկզբունքները**

10.4.1. Անկախություն և անաչառություն:

10.4.2. Օբյեկտիվություն և փաստարկվածություն՝ հիմնվելով բացառապես փաստական տվյալների վրա:

10.4.3. Թափանցիկություն՝ որոշումների հրապարակայնության ապահովում ուսանողական հանրության համար:

10.4.4. Գաղտնիության պահպանում՝ անձնական տվյալների և ներքին քննարկումների նկատմամբ:

#### **10.6. Հաշվետվություն և հրապարակայնություն**

10.6.1. Վերահսկիչ հանձնաժողովը տարեկան առնվազն մեկ անգամ ներկայացնում է գործունեության հաշվետվություն:

10.6.2. Հաշվետվությունը հրապարակվում է ուսանողական ինքնակառավարման

պաշտոնական հարթակներում՝ ապահովելով ուսանողների իրազեկումը:

10.6.3. Անհրաժեշտության դեպքում կարող է հրապարակել թեմատիկ կամ միջանկյալ հաշվետվություններ՝ առանձին դիտարկումների կամ կարևոր որոշումների վերաբերյալ:

## **Չորված 11.Կառավարման ձևերը ուսանողական ինքնակառավարման համակարգում**

11.1. Ուսանողական ինքնակառավարման համակարգում կարող են գործել հետևյալ կառավարման ձևերը.

- ա) Խորհրդարանական կառավարում,
- բ) Խորհրդի ձևաչափով կառավարում:

11.2. Խորհրդարանական կառավարման ձևը գործում է այն դեպքում, երբ ձևավորված է ուսանողական խորհրդարան: Սա կառավարման լիակարտար տարբերակն է: Խորհրդարանական այս դեպքում հանդիսանում է համակարգի բարձրագույն մարմին, իսկ Ուսանողական խորհրդարանի նախագահը համակարգի ղեկավարն ու պատասխանատուն:

11.3.1. Խորհրդի ձևաչափով կառավարմը գործում է միայն այն դեպքում, երբ ուսանողական խորհրդարանը որևէ պատճառներով չի ձևավորվել կամ լուծարվել է: Այս պարագայում համակարգի բարձրագույն ղեկավար մարմինը Ուսանողական խորհուրդն է՝ նախագահությունը:

11.3.2. Խորհրդարանի չձևավորման պարագայում, նախագահության կազմից ընտրվում է ուսանողական խորհրդի նախագահ, խորհրդի անդամների կողմից՝ ձայների պարզ մեծամասնությամբ:

11.3.3. Խորհրդի ձևաչափով կառավարման դեպքում խորհրդի նախագահը ընտրվում է 1 տարի ժամկետով առանց վերընտրման հնարավորությունների: Նախագահի թեկնածու կարող է հանդիսանալ նախագահության կազմի այն անդամը ով ունի ձայնի իրավունք:

11.4.4. Խորհրդի նախագահի լիազորությունները դադարեցվում են հետևյալ դեպքերում:

11.4.4.2. Այն պահին երբ ձևավորվում է ներկայացուցչական մարմինը՝ խորհրդարանը:

11.4.4.2. Սեփական դիմումի համաձայն:

11.4.4.3. Եթե դադարում է ունենալ ուսանողի կարգավիճակ:

11.4.4.4. Վերահսկիչ հանձնաժողովի որոշմամբ հետևյալ դեպքերում՝

- Նախագահի կողմից իր պարտականությունների կրկնակի կամ համակարգային չկատարման, ինչպես նաև ֆինանսական միջոցների ոչ նպատակային օգտագործման դեպքում:
- քաղաքական, կրոնական կամ կուսակցական քարոզչության իրականացման, ինչպես նաև ապատեղեկատվություն տարածելու կամ համալսարանի հեղինակությանը վնաս հասցնելու դեպքերում:
- դիտավորությամբ որևէ ինքնակառավարման մարմնի գործունեության անհիմն խոչընդոտման պարագայում:
- ուսանողական ինքնակառավարման համակարգում ընդգրկված ուսանողների օրենքով սահմանված հնարավորությունների սահմանափակման, անարդար մասնակցային հնարավորությունների ստեղծման, հասանելիք խրախուսումների տրամադրմանը խոչընդոտելու դեպքերում
- Նախագահության անդամների առնվազն 2/3-ի կողմից անվստահություն հայտնելու պարագայում: Այս դեպքում վերահսկիչ հանձնաժողով է ներկայացվում դիմում որտեղ հստակ նշված է պատճառը(ները):
- երբ խորհրդի նախագահը դիտավորությամբ խոչընդոտում է ներկայացուցչական մարմնի ձևավորմանը:

11.4. Խորհրդի նախագահը պարտավորվում է սահմանված կարգով յուրաքանչյուր կիսամիակի մեկնարկին առաջին ամսվա ընթացքում դիմել ընտրական անկախ մարմնին ներկայացուցչական մարմնի ընտրությունների կազմակերպման պահանջով:

11.5. Խորհրդի ձևաչափով կառավարման ընթացքում խորհուրդը իրականացնում է սույն կանոնակարգով բարձրագույն մարմնին տրված լիազորությունները՝ բացառությամբ ներկայացուցչական լիազորությունների, որոնք վերապահված են ուսանողական խորհրդարանին:

11.6. Խորհրդարանական կառավարման վերականգնումը կատարվում է անմիջապես խորհրդարանի ձևավորման պահից, ինչից հետո խորհրդի ձևաչափով կառավարման բոլոր որոշումները պահպանվում են ուժի մեջ՝ եթե դրանք չեն չեղարկվում խորհրդարանի կողմից:

## **Չոդված 12. Փոխարաբերությունը բուհի հետ**

12.1. Ուսանողական ինքնակառավարման համակարգը գործում է բուհի ընդհանուր կառավարման համակարգի կազմում՝ պահպանելով ինքնավարությունը, անկախությունը և ուսանողական ինքնորոշման սկզբունքը:

12.2. Բուհի ղեկավարությունը չի կարող միջամտել ուսանողական ինքնակառավարման ներքին որոշումների կայացմանը, բացառությամբ այն դեպքերի, երբ դրանք հակասում են օրենքին և բուհի կանոնակարգերին:

12.3. Ուսանողական ինքնակառավարման համակարգի պատասխանատու անձը՝ նախագահը պարտավորվում է սահմանված ռեժիմով, տեղեկատվական կարգով բուհի

ղեկավարությանը տեղյակ պահել ուսանողական ինքնակառավարման համակարգում ընդունվող ընթացիկ որոշումների, նախաձեռնությունների, ծրագրերի վերաբերյալ՝ ապահովելով համագործակցություն և թափանցիկություն:

12.4. Ուես-ը, նախագահությունը և ինքնակառավարման մարմինները պարտավոր են համագործակցել բուհի կառավարման մարմինների հետ՝ համատեղ լուծումներ մշակելով ուսանողների կրթական, սոցիալական և մշակութային կարիքների համար:

12.5. Բուհի ղեկավարության ներկայացուցիչը կարող է ներկա գտնվել ինքնակառավարման համակարգի նիստերին դիտորդի կարգավիճակով՝ նախօրոք համաձայնեցման պարագայում:

12.6. Բուհի ղեկավարությունը՝

- աջակցում է ուսանողական ինքնակառավարման համակարգի գործունեությանը՝ տրամադրելով անհրաժեշտ պայմաններ և ռեսուրսներ,
- ապահովում է ուսանողական կառույցների մասնակցությունը բուհի խորհրդակցական և կառավարման գործընթացներին՝ ուսանողական ներկայացուցչության սկզբունքով,
- պարբերաբար իրականացնում է հանդիպումներ ինքնակառավարման համակարգի ներկայացուցիչների հետ ուսանողական կյանքի և կրթական միջավայրի խնդիրները քննարկելու նպատակով:

12.7. Ուսանողական ինքնակառավարման համակարգի համապատասխան ոլորտային պատասխանատուները, իրենց լիազորությունների շրջանակում բուհի վարչական և ակադեմիական մարմիններին կարող են ներկայացնել առաջարկություններ, դիտարկումներ և եզրակացություններ՝

- Կրթական ծրագրերի որակի, կազմակերպման, գնահատման համակարգի, ուսանողների ակադեմիական իրավունքների և ուսուցման գործընթացի բարելավման վերաբերյալ:
- Ուսանողների գիտահետազոտական ակտիվության, գիտական նախագծերի հասանելիության, հետազոտական հմտությունների զարգացման և գիտական միջոցառումների կազմակերպման վերաբերյալ:
- Ուսուցման պայմանների, սոցիալական աջակցության, ուսանողների ներգրավվածության, բարեկեցության և ներառականության ապահովման վերաբերյալ:
- Բուհի և ուսանողների միջև տեղեկատվական հարթակների, հաղորդակցության մեխանիզմների, հրապարակայնության և թափանցիկության ապահովման վերաբերյալ:
- Ուսանողական միջավայրի, տեխնիկական հնարավորությունների, գրադարանների, լաբորատորիաների, սրահների և այլ ենթակառուցվածքների հասանելիության ու բարելավման վերաբերյալ:

12.8. Ուսանողական ինքնակառավարման մարմինների ներկայացուցիչները պարտավոր են հետևել բուհի ներքին կարգապահական և էթիկական կանոններին՝ ակադեմիական կառույցների նիստերին մասնակցել բարեխղճորեն, կառուցողական և ուսանողակետորն դիրքորոշմամբ:

12.9. Բուհի ակադեմիական կառույցները պարտավոր են ուսանողական ինքնակառավարման մարմիններին տրամադրել անհրաժեշտ տեղեկատվություն ուսումնական գործընթացի վերաբերյալ:

12.10. Բուհի ղեկավարությունը պարտավոր է ապահովել ուսանողական ինքնակառավարման համակարգի անդամների պաշտպանությունը այն դեպքերում, երբ նրանք ենթարկվում են ճնշման կամ անհիմն սահմանափակումների՝ իրենց ինքնակառավարման գործունեության պատճառով:

### **Յոթերորդ 13. Համակարգին տրամադրվող միջոցները**

13.1. Ուսանողական ինքնակառավարման համակարգի գործունեության ֆինանսավորումն իրականացվում է բուհի ֆինանսական միջոցների հաշվին:

13.2. Համակարգին տրամադրվող միջոցները կարող են ներառել՝

- բուհի կողմից հաստատված տարեկան բյուջետային հատկացումներ՝ ուսանողական նախաձեռնությունների, ծրագրերի և միջոցառումների իրականացման համար,
- նյութական միջոցներ՝ տարածք, տեխնիկական սարքավորումներ, տեղեկատվական հարթակներ և այլն:

13.3. Տրամադրված միջոցները համարվում են բուհի սեփականություն և տրամադրվում են ուսանողական ինքնակառավարման համակարգին օգտագործման իրավունքով՝ բացառապես նպատակային և փաստաթղթավորված ծախսման պայմանով:

13.4. Ֆինանսական միջոցների օգտագործման և հաշվետվության կարգը սահմանվում է ինքնակառավարման համակարգի բարձրագույն մարմնի կողմից՝ համաձայն բուհի ֆինանսական քաղաքականության:

13.5. Ուսանողական ինքնակառավարման համակարգի բարձրագույն մարմնի ղեկավարը և տվյալ միջոցները տնօրինող մարմնի ղեկավարը կրում են անհատական պատասխանատվություն միջոցների նպատակային և թափանցիկ օգտագործման համար:

13.6. Ֆինանսական խախտումների, չհիմնավորված ծախսերի կամ հաշվետվության թերի ներկայացման դեպքում վերահսկիչ հանձնաժողովը կարող է նախաձեռնել քննություն՝ ներկայացնելով միջնորդություն նախագահությանը կարգապահական կամ ֆինանսական պատասխանատվություն սահմանելու վերաբերյալ:

13.7. Կարող են իրականացվել նաև համատեղ նախագծեր բուհի վարչական ստորաբաժանումների կամ արտաքին գործընկերների հետ՝ համաֆինանսավորման սկզբունքով:

13.8. Ֆինանսական հաշվետվությունը հրապարակվում է ուսանողական ինքնակառավարման պաշտոնական հարթակներում՝ ուսանողական հանրությանը հասանելի ձևաչափով, ոչ ուշ քան հաշվետու տարվա ավարտից հետո 30 օրվա ընթացքում:

#### **Չոդված 14. Փոխհարաբերությունը արտաքին գործընկեր կառույցների հետ**

14.1. Ուսանողական ինքնակառավարման համակարգը կարող է համագործակցել տեղական և միջազգային ուսանողական, կրթական, գիտական, հասարակական, պետական և մասնավոր կառույցների հետ՝ ուսանողական կյանքի, կրթական միջավայրի և առաջնորդության զարգացման նպատակով:

14.2. Արտաքին գործընկեր կառույցների հետ համագործակցությունը պետք է ունենա ուսանողական ինքնակառավարման համակարգի նպատակներին և արժեքներին համապատասխան բնույթ և չպարունակի քաղաքական, կրոնական կամ կուսակցական շահերի սպասարկման տարրեր:

14.3. Ուսանողական խորհրդարանը, նախագահությունը և առանձին ինքնակառավարման մարմինները կարող են.

ա) իրականացնել համատեղ ծրագրեր, միջոցառումներ և նախաձեռնություններ՝ ուսանողական զարգացման ուղղությամբ,

բ) մասնակցել տեղական և միջազգային ուսանողական ֆորումների, համաժողովների, վերապատրաստումների և կրթական փոխանակման ծրագրերի,

գ) ստորագրել համագործակցության հուշագրեր և համաձայնագրեր՝ համաձայն բուհի կանոնակարգերի և ռեկտորի հաստատման:

14.4. Ուսանողական ինքնակառավարման համակարգի բարձրագույն մարմնի ղեկավարը կամ նրա լիազորված ներկայացուցիչը հանդես է գալիս ուսանողական ինքնակառավարման համակարգի անունից արտաքին հարաբերություններում և ներկայացնում է համակարգի միասնական դիրքորոշումը:

14.5. Արտաքին գործընկերների հետ ցանկացած համագործակցություն պետք է իրականացվի թափանցիկ՝ ապահովելով.

- համագործակցության պայմանագրերի և ծրագրերի հրապարակայնությունը,
- ֆինանսական աղբյուրների բացահայտում և հաշվետվություն,
- շահերի բախման բացառման երաշխիքներ:

14.6. Ուսանողական ինքնակառավարման համակարգը կարող է անդամակցել տեղական կամ միջազգային ուսանողական միություններին, ցանցերին կամ պլատֆորմներին՝ պահպանելով ինքնուրույնության և որոշումների անկախության սկզբունքը:

14.7. Արտաքին կառույցների հետ փոխգործակցության շրջանակում ՈւԼԽ-ն և Նախագահությունը պարտավոր են ապահովել բուհի հեղինակության պաշտպանությունը, ինչպես նաև չվնասել բուհի և ուսանողական կառույցների համատեղ շահերը:

14.8. Միջազգային համագործակցության նախաձեռնությունները համակարգվում են Նախագահության կողմից նշանակված պատասխանատու մարմնի միջոցով՝ համաձայնեցված կարգով:

14.9. Արտաքին հարաբերությունների ոլորտում ուսանողական ինքնակառավարման համակարգը պարտավորվում է գործել փոխադարձ հարգանքի, հավասար գործընկերության և փոխշահավետ համագործակցության սկզբունքներով:

#### **Գլուխ 4. Եզրափակիչ մաս**

#### **Չոդված 15. Կանոնադրության փոփոխություններ և լրացումներ**

15.1. Սույն կանոնադրության փոփոխություններ և լրացումներ կատարելու վերաբերյալ առաջարկ հոգաբարձուների խորհրդին կարող են ներկայացվել՝ ուսանողական խորհրդարանի անդամների առնվազն 2/3-ի որոշմամբ, Նախագահության խորհրդից և վերահսկիչ հանձնաժողովից դրական եզրակացություն ստանալու պարագայում:

15.2. Փոփոխությունների կամ լրացումների նախագիծը ներկայացվում է հոգաբարձուների խորհրդի հաստատմանը:

15.3. Փոփոխությունները ուժի մեջ են մտնում հոգաբարձուների խորհրդի կողմից հաստատումից հետո, պաշտոնական հրապարակմանը հաջորդող 10-րդ աշխատանքային օրը: